

縵雅堂駢體文

二





文體駢章雅集

一

著黃紹

編主五雲王

編初成集書叢

文體駢堂雅縵
冊二

中華民國二十五年十二月初版

著者 王 詒 壽

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

章

緜雅堂駢體文卷五

報孫彥清書

首春得惠書。人事凌雜。久缺不報。鼻鼻勞燕東西。川陸修阻。思而不見。亦既勞止。足下驅車冀野。解轡大梁。尋兔苑之往基。溯孝王之故事。其亦思浩歌衛風。高詠周雅。延鄒生召枚叟之風。而慨然歎不與古人同時乎。汝州假榻。縱游嵩岳。訪少室之仙迹。陟黃蓋之高峯。吐納煙靄。呼吸青蒼。鸞獻鳳吟。天風振蕩。又何其豪也。春官報罷。小住都門。以君通悅。得失何系。惟自儻從北行。嚴燠屢易。閨中有刀環之盼。孺子值宜教之時。雖鰲鶴未招。亦當一脂歸轄耳。僕自從事書局。于今三年矣。老蠹三生。不飽神仙之字。秋兔一束。仍同吳市之簫。比者楊大中丞復采及微薄。屬總校事。竊念校讎之學。匪云小道。對勘狀其精嚴。埽塵喻其難盡。訂隻文之異。無證則誣。存本來之真。闕疑亦貴。而世有淺人。昧于古義。不識壺盧之本。勇于妄改。亂點金銀之車。逞其率臆。輒成笑柄。用以競競不敢少忽。秋深夜寒。江館漏永。同志三五。鐙火參差。相與考證異同。補拾錯墜。往往寺鐘欲動。黃墨未已。蓋亦藉以增求古之識。破羣言之惑。心乎樂之。不爲勞也。上冬之杪。爰理歸櫟。小集娛萱之圃。止宿鷗水之堂。勉鉏秋戰新捷。意與自勝。幼眉高才被落。兼抱騎省之戚。邕闕無歡容。然讀其近所爲詩。益進于婉篤。而無浮響。倘所爲窮而後工者邪。歲云莫矣。風雪閉門。聊貢所懷。不盡翹結。

寫觀世音經告文

粵自華蓋雲香。金塔啓青駕之刹。銀旛花擁。玉宮繙靈鷲之文。輝寶月於蓮臺。雀離閱其教。暢宗風於榆櫨。龍樹衍其源。緬惟慧照。咸導法航。式輸贊唄之誠。尤被慈悲之力。伏惟濟世上尊。能仁大士。顯化在妙莊之國。留迹于落伽之山。紫竹成林。卽是貝多之樹。玉餅插柳。便成摩歌之花。鼈頭示象。安法界于閻浮。龍女皈真。扇宏風于巨海。宣五光而普渡。運千手以拯人。但伸呪願。卽種因緣。能誦真言。何羈感應。故昔者虎牢戰苦。白馬飛來。象突山高。金師震吼。徹奇輝于水底。風雨谿寒。消猛火于林中。弓刀路隔。中流禪舫。神颺吹如鳥之帆。午夜香鐙。法雨照飛狐之路。亦有星沈貫索。白獸開尊。雪斷歐刀。青螺示寤。益陽獄急。幻素羽于鶴屏。南宮身危。迴兇鋒于狝虜。千徧致金雞之放。五道開鐵犴之門。加以離狐魂返。透珠汗于緇衫。紫鼠丹成。滴玉涎于翠竹。銀盆滿腑。勝龍宮之禁方。鐵鑊煉魔。問蛇神其安往。凡是沈災之拔。竝由持念之誠。略陳往事。足證珠林說法之編。若數宏慈。非徒金剛鳩異之作。至若銀橋老母。妙女持幢。金坐比邱。閻摩合掌。雖迹鄰於縹緲。要理推乎固然。故冥福之有資。亦史傳所附見。詒壽五濁。凡根六尺。塵質曾參妙諦。誦匪代以孝經。謬附文人。業敢矜乎夙慧。永懷罔極。追念慈幃。銅罌素萼。旣愧子懋之花。寶鏡彤爐。復慚敬宣之佛。用裁青簡。別滌冰甌。鵠尾難靈檀之香。犀液調金泥之粉。敬寫觀世音經一通。伏願春迴幽室。露灑宵途。餅浮五彩。見普照之光華。雲涌千蓮。示菩提而接引。倘比瓊宮璇室。摩耶登切利之天。敢忘紫馨紺魚。木患轉婆羅之號。

送譚仲儀之皖序

歲在焉逢閏茂仲冬之月。譚子將以縣令試于皖。儼裝貞吉。艤棹待行。時則江梅垂發。煙邃弄寒。夕陽滿衣。吳舫如屋。送者既集。祖席斯敞。其友山陰王詒壽。乃起屬之酒曰。行矣譚君。勉旃自愛。行將縮銅章。佩黃綬。振絃歌之響。爲民社之官矣。以君通才。何愧良令。竊衡簪海。蒙有感焉。夫萬戶作長。百里典城。焚劇仰承。黎元縣命。故昔者東里設操刀之喻。元明深飲酒之戒。凡以重其任也。自軒蓋日盛。清濁遂淆。但豔厥官。遠計乃職。稽其習尙。可得而言。本謝學之素優。又蔑文之無害。階緣時會。獵取一官。將以籌白檀之餉。漁奪是其本懷。將以償紫纈之輸。興生問其孰利。餓豺之喙一尺。點狐之幻百方。丹魄紫裘。服翫侈其珍麗。季蛇叔虎。僚友較乎瘠肥。是謂沓墨。其大較也。以賊深博。燭奸之名。以苛暴爲濟貪之具。笞榜百楚。儼鼓吹之悅聽。呼暴滿堂。置是非于不問。凝血棒赤。斷骨枷青。善族碎于甌猾。而豪強不敢擊。愚眈畏若踞蝮。而盜賊益以橫。是謂毒螫。其尤甚也。性本恂慙。習爲愉緹。非士元之驥足。效子猷之馬曹。亦管判事。棲屋腐豪。黃被放衙。午鼓沈夢。知慧蔽于夔季。教令傳之胥奴。目眩黃白之局。何心乎亭疑。體被金毳之華。有同乎土偶。是謂韞齋。乃其次也。若此者。大府壅而不聞。同列不以爲賊。其有一二自好之士。清靜之吏。則且非笑之。詬病之。目爲崑愚。標之異黨。嗟乎嗟乎。所謂導揚惠字。古循吏之風。其尙可問哉。譚君高字邃器。淑質朗抱。甄明經學。發揮文章。不以之振龍藻于螭頭。侍清問于豹尾。乃降心抑首。俛仰其中。雖曰猿投有林。得無鸞枳致嘅乎。然僕之意。則有進也者。夫置美程于叢确。不能蝕其光者。其質純也。伍衆

草于瑤芝。久亦染其烈者。其感漸也。君抱其所學。策名王途。白壁見賞。赤符卽下。識辛昂之達。俾行成都。知卜式之能。便除緱氏。庶幾以儒術潤吏治。以文雅道禮化。樹居職之表。作鄰城之宗。或能使顯虐感其惠風。闢葑聞而興起。佳乎吏也。不其盛與。且皖蒙舊游地也。形勝之國。冠斗襟江。爲魁偉之所棲。多名賢之故治。閒嘗詢父老。讀銘碣。如獨孤賜魚。孟宗封鮓。涪翁以篇什顯。游酢以理學傳。翟公黃父之清風。西谿權陽之惠澤。竝有遺蹤之可指。非徒志乘之僅存。君驅車上下。當亦流連往徼。遐思芳軌。而喟然以慨乎。三爵告盡。棹歌已發行矣。譚君勉旃自愛。爲吾鄙光。爲黔赤福。江水千里。待君好音。

帶經堂記

夫棲心龍秘之府。驚精虎觀之奧。而不辨桐芒。不知鐸鐻。田荒奈何。瘞身赤犢之策。崑志丹扈之藏。而不親筠素。不識墳索。學荒奈何。揚子雲有言。古之學者。耕且養三年。而通一經。明耕讀之未嘗偏廢也。吾友定海黃君元同。海岱清士。東南通儒。樊重善稼。著世門于南陽。曹褒定禮。傳家學于慶氏。有田一頃。擁書百城。養沖情于素風。衷羣言于先聖。嗣君善學。早著譽籍。既同玄尚。克承青箱。爰于甲戌之冬。除舍北之隙地。構谿南之草堂。闢綠杉以爲扉。種丹荔以網壁。徑僻迴俗。窗虛向陽。不崇雕華。取適枕肱。君顧而樂之。乃取漢兒寬事。顏之曰帶經。明所志也。爾其煜煜丹實。蓂果林于面軒。濛濛翠雪。展茗旂于傍砌。蘭雨低檻。橙陰覆檐。繡野錯乎東西。流泉縈其左右。其中則有藜閣珍校。瓠中舊編。縹帙雲排。松籤鱗次。琳琳乎。琅琅乎。古文奇字。兼收漆簡之蟲。瓊葉靈芸。曾無羽陵之蠹。乃薰鑪香。卻塵軌。餐典籍之芳潤。尋道術。

之囊。禽鳩雨澤土。燕巖暖人。時挾青編。言涉華畝。載耕載誦。斯樂斯陶。香來餅餌。聲出金石。林鴛爲之息羽。田鶴爲之引吭。亦羲皇之風矣。抑又聞之。通經之用。非徒淑身。利居之貞。豈必遺世。它日者持其所尙。設施王途。則將崇詩書。教稼穡。使爲學之士。明繡鞶之非珍。執業之子。知播琴之毋惰。是又足以踵儒雅于漢京。媲宏風于千乘者也。杭州朱西泉。以經苑之宿彥。通畫學之六法。于君爲同歲生。堂旣落成。因屬之爲圖。而余爲之記。

送何竟山之官建州序

離離津樹。春風始來。芊芊芳草。暮色千里。何子于是策青駒。發蓬驛。泝穀渚。踰霞關。以達乎建州。試其郡丞之官。方祖筵之旣張。咸贈言于臨別。有客慨然中坐而起。謂余曰。何子以揆摛之彥。投足簿領之中。非策之善也。吾爲惜之。余曰不然。士有儷俊青翻。擷秀丹穎。汨心油素之困。騰藻龍魚之肆。折翅屢遭。鼓氣彌勅。往往素絲被領。青雲無路。枕息乎繩纜之內。資生于句讀之師。翻然而悔。亦云晚矣。何子懷抱利器。不及其壯而思變。將使執蠹帙以老乎。且扇皇途之鴻風。亦何必由春官之墨榜也。客又曰。何子嘗守廣文之官矣。真除可期。儒官非賤。今之改弦。吾又慮其迷轍也。余曰。是又不然。夫昔者陳思作頌。表矩範于學官。鄧禹論才。可問學于博士。固知郡國之師。卽爲治化之本。自後世以道術爲拘迂。遂置師儒于不問。而居其職者。亦復冥憲自甘。萎腰不恥。騎疲驢于官舍。擢元雁于臬比。青袍弟子。視等草萊。黃綬同官。資爲翻弄。成仕宦之末境。乃壯夫所不爲。何子是行也。譬之臺臺寶珠。所在見貴。青萍神鐵。發匣騰光。槃槃

之才。其甘以寂寂終乎。客又進曰。然則何子曷不爲專城典牧之官。而爲秉簡佐岳之吏也。曷不至南都名勝之區。而至東海卑溼之地也。余曰。是說也。又所謂知一而不知二者也。龐士元之展驥。當在治中。盧渭州之佩魚。乃由從事。半刺之任。五馬同符。況蠻疆要阨。東州奧區。海上之烽初銷。番夷之情叵測。赤旗化鷲。白馬展猷。亦功名之會矣。且夫鸞孔振翼。不入赤霄之羣。金匏合肆。始播降神之奏。今越中雄俊君子。如周季貺。傅節子。諸君。皆以郡丞官閫。何子以榆里之好。簪海同趨。則將朱轡互引。宏此絨佩之規。龍藻相輝。非直殷勤之雅。是更非君所及知也。客意乃解。引滿而起。余遂詮次問答之言。以贈何子之行云。

與陳藍洲書

八月一日在越。得徐紀報云。儻從須松谿回始發。計當在二十後耳。初十日到會城。思得展西窗之談。握河梁之手。而足下已于前二日行矣。水雲蒼蒼。瞻望弗及。願言之懷。良用悵然。義璘迅邁。晦朔又周。伏惟颿程多泰。軌途早抵。漢江青山。聳若侯吏。武昌官柳。秋來迎人。棲琴旣安。柱版伊始。足下以經術之彥。負明通之才。明月夜光。見者知寶。猶憶前歲之秋。足下與僕及均父抵掌江樓。各據所抱。因言它日者。或出領民社。設施何先。僕以拙疏。甘謝不敏。均父雄氣雲翔。壯詞濤涌。謂當使豪強糜于赤棒。猾胥懼其火符。意啓法隨。威行郡國。而足下獨謂悃悞無華。漢后良矩。吾有民社。請事斯語。其時涼月在簾。江湖正怒。拔劍起舞。撫掌大哈。迴首前塵。如昨日事。足下今日領震雷之封。試製錦之手。當酬曩言。流慶蒼赤。獨念均父。南池垂翅。西陲仗劍。一官未成。萬里孤往。玉關信阻。元律告寒。青袍疲馬。稅駕何所。輒爲嗟結。不復能

置僕局迹緹素。顧影寡儔。自君之行。松老旋返。離抱未暢。青驪載駸。仲子比日歸來。皖中之行。當亦不遠。無多良友。忽復分散。湛湛江水。極目千里。皎皎明月。懷人各方。此其所感。又何可言。楚北襟江帶河。形勝之地。罷參散帶。常展雄覽。其地風習如何。鄉縣既殊。服食自別。伏希起居珍衛不宣。

答施均父書

均父足下。河梁攜手。曾賦五言。耀靈振轡。條彌一載。秋閒松谿歸。述足下拂衣出都。萬里西邁。保陽遭負。匱之盜。太行墜再蹶之馬。毅然長征。不復返顧。豪邁之氣。聞之神王。旣念孤蹤關塞。冒犯霜露。登樓引領。復用悵結。歲聿云暮。始得十月十日。皋蘭書。發函伸紙。迴環三復。鋒振詞舉。有同抵掌。夫豐城劍氣。待茂先而始騰。雒陽玉檢。遇子伯而增寶。足下之見器于相國宜也。足下習虎鈴之經。抱龍驤之志。以枕戈之越石。依當代之夷吾。誠神蛟得雷雨。駿足步風雲之時。虎牙建節。燕領封侯。烈士壯猶。固無多讓。然必謂功名當如班超。陳湯。而以一郡一邑爲未屑。僕竊以謂過矣。夫守郡者股肱之任。臨邑者政化之基。宣帝有言。惟良二千石共治。漢官之制。掌一萬戶上爲令。典剔仰施。黎元繫命。故古者郡邑良吏。類有公輔之器。將帥之資。或亦九變起。黑山寇來。則且提枹展旂。揚武定甌。其蕤績丹常。熠氏青簡者。蓋比比也。僕願足下韜鉞櫜彩。和光葆貞。循資以求。隨分而處。勿舍夷途而趨險軌。勿棄近績而夸遠功。此則萬里故人。所殷殷進規者耳。數月以來。松谿赴江右。藍洲赴荆門。仲修赴皖南。竝以長才。聘于王路。僕冷螢無燄。老蠹同餐。側身四顧。彌悵寥落。良朋星散。薄俗雲浮。如何如何。海濱騷動。幸已銷烽。天台之變。乃由征賦。弄

潢池之兵。無非赤子。聚南山之盜。尙是白徒。誠得賢長官善處之。當無慮耳。朔風凜然。聽園梅開。巡檐孤嘯。懷我知己。邊地苦寒。雪厚幾許。伏冀眠餐。倍萬珍重。

歷朝詩錄自序

粵自瑤練衍朱琴之譜。網罟興歌。瓊絃流素瑟之聲。豐年繼詠。騷齒應參之帝。傳咸黑之奧文。蛻精貫月之朝。據叢雲之浩奏。拜靈霧于韻座。松棟留音。仰卿瑞於紮雲。薰琴播美。襄陵逸唱。實媿盛于廣揚。晨露清詞。乃先軌乎比興。以及素王之所訂。湘纍之所吟。八風肇律。七鬯宣和。至晉所流。復乎莫尙矣。若乃赤炎統序。黃靈膺圖。蘇李振其先聲。曹劉展其駿步。承源乎騷雅。揚蕤乎琳琅。典午開清新之途。南都尙緝麗之製。藻彥鱗襲。雕章鳳鵠。至夫有唐。是際極盛。麟德之世。四傑擅其勝。大歷而後。十子爲之宗。掣青鯨于碧海。旣拓盛朝之觀。縈落花于迴風。亦標晚紀之致。逮乎宋金之作。元明之篇。洵風雅之代興。有才人之踵起。雖其體或殊。夫洪纖而發言。咸係乎時會。要皆抒自得之精蘊。成一代之風氣。而論者好爲高語。謂體必尊漢京。誦勿踰盛唐。比齊梁于皇琴。斥季近爲紫色。吁。何其慎也。夫詩言性情。百代同軌。溯其所自。可得而言。彼夫金門妙彥。玉苑儒臣。柏梁繼音。龍池應制。廣頌之體。麗則同歸。若乃落日弔古。結渺思于煙雲。碧山棲沖。寄高情于泉石。亦有楓林江水。良朋遠去之時。草色天涯。客子思家之日。志士失路。投足無門。孤憤鬱懷。問天不語。莫不發孤唱。起慨歌。託閨襜之宣幽。協宮徵以寫蘊。故人代所隔。雖有遐邇之分。天機所流。必無異同之致。出乎真性。卽成雅音。苟旨趣之無乖。自矩矱之有在。何必規規焉。過爲區區。

別哉。僕愧非揆摛之才。略識詠吟之旨。蛩號自惜。獮祭甘譏。爰卽夙習之舊編。爲別錄于暇日。撥其珠玉。不爲主客之圖。翦其蕭糧。蔑因時代而泥。不名一體。轉益多師。用作敵帝之珍。敢曰騷林之表。嗟乎。一士之生。百年如寄。上之欲明廷高議。定縣叢之儀。次亦當祕閣陳書。繼青藜之業。乃徒沾沾於雕蟲之末。矜窺豹之論。亦可慨也夫。

春游湖上小記

甲戌三月之二十日。林雨乍過。新綠媚人。輕風不寒。薄陰垂水。乃呼吟臚。約獻侶。白拾三四。蘭漿一雙。言從涌金之郭。汎乎明聖之湖。于是緣修隄。溯枉渚。穿平橋。指幽麓。激波穀展。鷗路入花。古藍雲藏。魚唄越竹。羈榜槩樹。潑薜碧甌。長髯挈壺。老曇迎客。攜鑽籬之珍菜。烹水梭之小鮮。舉酒促棹。放乎中流。魚鳥寫其娟妍。煙波樂其清曠。南高北高。遙接雲氣。襄湖外湖。淡隔柳景。色秀餐可。綠淨睡難。余乃岸幘四顧。敏舷而歌。歌曰。水如掌兮山如眉。方仙舟兮澹忘歸。春欲暮兮花亂飛。君不飲兮何爲。客和之曰。水如鏡兮山如螺。燕燕舞兮鸞鷲歌。勸君飲盡金叵羅。佳辰良會苦不多。清韻道然。林壑衆應。白雲依依。夕陽欲墮。返羽拂水。暝色漸合。迴舟遵岸。乘風詠歸。夫冰幘繡檻。泊藤陰之伎船。金絲玉簧。流花底之珠唱。往昔歡游。非無綺集。然而悅魂于歌舞。則曠逸之趣不專。綴目于欽黛。則崢泓之觀或蔽。故竹肉之縟節。不若山水之清音也。朱翻之錯列。不若鷗鷺之相親也。翻一葦其可杭。忻良儔之共載。飄飄然作天地閒想。汎汎乎分水中之鳧。于胥樂兮。何以加茲。因泚筆記之。以志一時雅趣云。

秋舫填詞圖自序

余自庚午歲以撫軍楊石泉中丞之辟。校經虎林。去家不遙。閒日可達。每值秋霽。輕裝往來。自解西陵之纜。至于北郭之廬。江程紆回。水木明瑟。烏篷八尺。坐臥雜以酒餅。青山一窗。煙雲供其畫本。興之所至。輒譜小詞。觸盼流聲。不假錘琢。用以酬清景。寫渺襟也。于時江籬送香。汀樹未脫。清陰垂野。輕寒流衣。蓼雨一尺。夕陽乍晴。蘋風半灣。涼色在水。亦有蓮女單幟。菱娃疊舸。低徊江南之唱。宛轉西洲之曲。及乎清霜戒冷。白雲不飛。肥菰蘸波。野雁忽下。殘荷掩寺。一僧獨歸。菊離離其綴芳。蘆蕭蕭以答獻。暝煙墮樹。皎魄出林。禿柳橋欹。晚漁發其清唱。黃葉邨小。遙鎗生夫水光。莫不引白石之幽情。入賈洲之籟譜。夫昔者端已扁舟。沮棹乎章水。甫里高致。恣情於苕谿。良以途危則跬步比之靈關。程夷則浩蕩等之衽席。猶憶辛酉之秋。狂寇滔天。吳越陸沈。閒關避地。扁舟西下。同此百數十里間。青烽照乎碧波。斷骸橫于高岸。腥風如虎。瘦日不輝。狐鳴狼跑。耳礪目棘。谿葉偶卷。疑邏騎之忽來。林鴉四飛。驚妖旂之突起。江笛無語。惟聞哀角之聲。水花自紅。卽是殘魂之血。當此之時。惴惴焉。皇皇焉。又安知有水鄉之可樂。秋色之足賞哉。今者塵甑早滿。江戍無警。價徊乎浦溆。揚擊乎中流。魚鳥親人。江湖有味。高歌水調。和以鉞絃之聲。散髮天風。招彼吹笙之侶。亦未始非吾生之厚幸也。夫錢塘朱西泉孝廉。讀余詞而好之。爲作斯圖。余遂自序其緣起云。時甲戌仲冬日。

病榻憶語一卷。會稽孫瘦梅觀察哭其女越畹女史而作也。芳蹤欲塵。秋淚不熱。殺青甫竟。來徵弁詞。僕也買鄰千萬。幸接清風。通徑十年。與共明月。其時青谿妹小。問字花簾。左家女嬌。待年羅屋。與女史問訊。時通過從勿閒。燃脂互寫。珍珠密字之牋。壁繭聯吟。金縷寶釵之句。紛茲內美。芳其彌章。繁言不聞。淑履可述。夫其珍同么鳳。慧兆翠雞。陶靖節之慰情。尙憐其弱。張安昌之愛女。頗甚于男。生長乎綺羅。出入乎保抱。縱使性成嬌惰。嗜在麗都。以論清閨。未云累德。而女史則蕙心獨幽。梅格不俗。五紋綵綫。時挑夜繡之鐙。百蝶羅袿。不結春游之伴。畫螺硯畔。每雜青編。吹絮簌中。兼藏古墨。誦南華秋水。身是綠衣之仙。錄北山移文。書奪金鑾之迹。翡翠之牀在手。珠玉之唾隨風。喜書早見乎九齡。熟簡已盈夫三尺。況乃晨妝埽月。修蘭笑以承顏。午課吟花。捧桃牋而繞膝。叢編代檢。雲葉阜羅之廚。僻事能徵。錦舌青瑤之乘。由來淑女。不異佳兒。如此仙姿。合歸天上。雲冉冉其引。風飄飄兮吹衣。明星玉女。手白蓮以上征。青靈羽人。卓翠幢以早待。皆卷中本事 墨蜚之境。匪幻。白鸞之召。旋來。溯其示疾之初。迄乎彌留之際。玉骨支瘦。不廢鳴蟬之梳。絲喘顛涼。尙戀秋蛭之字。觀察則水量磁斗。藥屑銀船。龍宮檢方。丹九還而莫合。雁鎧警。夕五起而猶驚。一霎曇花。半年病葉。五絲安續。雙淚空彈。蕭瑟珠櫳。永絕青絃之響。叢殘。勸翰。忍開黃竹之箱。徒憶其零星倚枕之言。冀抒此夜雨虛帷之感。亦可悲矣。然而悲歡境也。修短命也。綵雲之聚散。何常。舜華之盛徂。隨化。況乎吟傳七字。綠楊鐙景之篇。決別一言。碧落天邊之約。俱本 容華著才媛之號。飛瓊返仙島之真。瑤海雖遙。珠輝宛在。嗚簫乍奏。恍睹乎桂旗。雕華勿湮。有同夫梓瑟。將見香函展碧。咸誦秋風。

楚些之詞麗句敲金爭題明月湘君之什。

緜雅堂駢體文卷六

皋園修禊序

歲在困敦。粵上斯已。都轉秦澹如先生。乃約獻侶。攜芳尊。修禊于會城之皋園。地饒水石。亦美雲木。翡翠
篆徑。縹泓鏡軒。本觴詠之勝區。有滄浪之舊館。于是芳莢一碧。游絲十丈。春陰在水。燕風散襟。展花棚于
綺除。藏行廚于竹裏。軒蓋不雜。琴觚閒陳。招片紅以陪笑。香生酒鱗。嚶絳羽以答歌。清若笙吹。瑤情旣暢。
玉山未頽。言飛羽觴。乃臨芳澗。苕帶量碧。葉葉乎春衫。蘋波濯纓。羅羅乎流水。孰客孰主。或喁或于。發裏
古之幽情。振凌虛之遠歎。可謂標韻簪林。契沖物表者矣。夫浮生電謝。曦璘之騁不停。世事雲浮。滄桑之
境倏變。況乎百年風日。佳時幾何。千里萍蓬。良覲不易。故昔者蘭亭繭紙。內史興陳迹之悲。涼苑雲輅。參
軍有上日之記。莫不俛仰身世。流連勝集。發爲篇詠。傳之後來。先生以爲古人往矣。清濁可武。乃以落花
芝蓋。楊柳春旂。流觴曲水。茂林修竹。分韻賦詩。而屬詒壽弁以序。雕瓊鏤采。無拘金谷之酒籌。簞水笙山。
遂播芳園之韻事。會者凡十六人。

復見心齋詩集序

歲在丙寅。序屬首夏。詒壽于役暨陽。解裝邑署。杭州孫翔伯先生。名山選勝。謝公之屐方來。高館張鐙。陳
蕃之闢初下。先生儒林丈人。陳芳鴻彥。良德儷玉。寶行比金。篤詩禮之傳。趨鯉承訓。綏德門之慶。行馬早

施。故得棲養沖飶。婆娑風月。松石寫其高致。巖壑恣其清游。閑雲自舒。纖塵蔑置。僑谿南之詞老。爲地行之神仙。松格旣瞻。蘭味斯洽。呼之小友。訂以忘年。豈相與登紫閣之名岨。訪翠峯之遺構。尋浣紗之古石。弔苧蘿之荒祠。松翠十里。桐雪一尺。烏桕閒挈。赤藤謝攜。谿女笑指。疑爲羽霄之侶。山禽引吭。答此鸞歎之聲。討幽彌旬。得句盈軸。歸轄旋動。臨別惓然。于時兵火始熄。先生尙僑居甬東。湛湛江水。渺渺予懷。不見之恨。寫以三秋。加餐之書。動輒一束。無何。詒壽就官冷曹。屢理西渡之檝。先生亦返錢唐故居。王粲造中郎之門。倒屣常驚乎一座。陸贄入張鎰之室。傾談或至于三日。秋風桂樹。則踢臂尋幽。微雪梅花。則竝履覓句。招孤山之老鶴。策段橋之蹇驢。無閒追隨。以永晨夕。嘗出其復見心齋詩全藁相示。靈弢獨解。天機自然。濯瑤蕤于秋泓。激涼吹于空碧。而先生唾可成珠。懷偏似竹。以炫服之俗嗜。居美理而勿珍。象陳賤子之芻言。用發主人之攻笑。夫蛇珠謝銀黃之飾。奇光自呈。螭鏡錫澄冰之輝。纖滓何綴。故尙素者不貴乎組綺。崇樸者不藉乎琢雕。今之襲金彩于土偶。澤膏澗于東家。爲麟之棧。爲驪之爪。言乎騷雅。翻其反矣。先生獨能彈其古調。抒此性靈。良璧無瑕。澹詞彌雋。雖儲篇沮溺。莫悅眯盼。而白章嫗解。何害大家哉。文字之契。丹雞可盟。官檄相催。青駒在戶。疊商致感。方吟杜陵之詩。龍蛇在歲。偏兆鄭公之屐。蓋自詒壽驅長山之車。先生已示維摩之疾矣。悲夫。元雲起而金芒掩。秋草碧而玉樹埋。重來門巷。傷心馬箠之揚。回首笑言。無復鹿牀之共。重泉永隔。十載于茲。屬者嗣公子授學士子。指學博。以詒壽素見知于先生。審其遺草。諉之訂編。自惟樸昧。何敢定先生之詩。顧念往日者。嘗與先生登臨江之樓。展夕陽之眺。感雲

煙之變幻。傷陵谷之遷移。浩然顧詒壽而歎曰。人生百年有同駟。卻浮世一雲。當留豹皮。吾夙嗜在詩雅。不欲求合于世目。又不自選擇。全稟具在。它日定吾之集。子之責矣。是則訂敬禮之遺文。抑亦踐橋公之夙約也。詒壽又何敢辭。因爲刪訂成六卷。而敝生平之雅如此。縞鶴不返。老成猶見其典型。黃金可銷。詩卷長留于天地。

漚花小錄序

自昔錦屨點落花之響。臺畔留香。玉簫傳秋拍之聲。竹西騰吹。千家算雨。不卷珠簾。十里春風。長嘶金絡。讀子夜鐙前之曲。諷楚腰掌上之詞。但是嬌花。多栽吳苑。由來明月。大好揚州。旣而軍鼓聲高。霓裳羽散。兔絲安附。儂爲海上之萍。燕子移巢。春滿浦西之柳。花穿雙曲。都種枇杷。鏡落千鬟。時驚翡翠。鈿笛共雕琴競奏。麝霏偕蘭雨齊飄。綠房窈窕。七二文苑。紫珀迷離。一雙青鳥。于是松陰立馬。逢西陵之碧車。花下留歡。解漢皋之玉佩。絳蠟露華之照。金槽根根。朱璫綃霧之垂。香囊叩叩。真可謂金粉江山。綺羅窟宅者矣。乃有玉句詞客。畫楫俊游。披王曇首之紅衫。聯杜樊川之白袷。閑情拾翠。迎桃根姊妹之花。刻意尋芳。極環燕瘦肥之態。春鐙勸酒。點紺暈而衣香。碧玉低鬟。壓翠鈿而帽側。雖我輩鍾情。不及于亂。而其人傾國。領略爲多。豈乃細較羣芳。閑裁側理。評以錦字。詠以珠篇。鏤管金銀。略擬湘東之品。玉樓釵黛。已空冀北之羣。錄之作也。僕有感焉。夫綵痕偶聚。瑤穹無不散之雲。薜華從風。香海少長生之種。昔之皋橋豔品。洛下俊姝。成都校書。楚江錄事。假不經才子之品題。詞流之標詠。則柔荑不固。早化秋煙。墮絮無聲。誰傳

小字嗟乎嗟乎其與士之附青雲于一時。隨流塵于身後者。何以異邪。故江東疏放。厥有北里之編。遷客老顛。斯作江花之藻。雖曰游戲。非無寄矣。楮墨所流。今昔胡異。象使鳳窠羣女。有同翠玉之鐫。鶯海名葩。永播紅絃之韻。

藏書自記

僕夙抱韋述耽書之癖。頗爲常景古帙之求。芸苑珍編。綈叢瓊葉。例以充倉之富。雖見誚于兔園。用作饋貧之糧。亦足資其懶祭。無何。狐鳴搆。狼頭肆。單舸出走。窮海轉徙。皮諸室者。旣百椽之竝。燼挈以行者。詎兼兩之得載。加以桂玉多艱。萍蓬無定。愧謝僑之守。充食竟用班書。賃虞和之廬。覆雨兼無素被。數年之間。雲飛葉散。什一僅存矣。腥螻旋埽。飛鳥得依。結習未忘。見獵輒喜。付長生之庫。尙贖絮袍。減陽城之餐。已非榆葉。艱難所得。篋衍漸盈。又比以應辟校經。頗勤攷訂。治官多隙。從事私書。往往丹烏窺牖。卽研黃露之珠。銀蟾入簾。未輟縹花之管。素王之所訂。青簡之所編。稷下龍雕之文。冢中蠹竹之字。不無證信。多有刊訛。緘花藤而鱗排。護紺帙而麝襲。雖謝萬雉之坐擁。幸蔑一鳴之見譏。顧而樂之。輒成獨笑。或有憐其嗜之篤。而嗤其藏之少者。蒙則有說。聊用解嘲。夫羅岷漢以爲府。不若蒼壁小璣之在握也。集金毳以疊笥。不若尺縞幅縮之日御也。世有競積玉于縣圃。夸連雲于芬林。萬卷名樓。五車著富。猶復搜壺中之祕籍。訪石室之異文。奇光接軫。欲傾江左之藏。瓊寶充箱。有類重龜之掌。然而頻年函錦。滿室棲香。嬾龍夜守。偏矜福地之居。羽蠹晨飛。任飽神仙之字。徒慕博收之名。曾無留目之賞。是爲觀美。蒙無取焉。

亦有胃承通德家有賜書傳祕閣之副本碧鏤牙籤挹天祿之餘輝青遺藜照藉藉錦帙金箱玉版之珍森森寶書東序西園之美而乃車難合轍學早分途夸繡綫之新樣別有金科斥古籍作旁門束之塵閣是猶葉幹儲度取材于枉橈羊珠彙槃耽翫乎沙礫孤此琳琅蒙傷之矣嗟乎笙匏之器星羅豐壤祇安其寂藻翟之章雲襲矇叟不知其華徒矜曰多又將奚爲哉且夫得之艱者視之彌珍業之素者愛勿能輟蒙以刃底之魂獲此劫餘之賞謝銀車之汚墨足比大園良書發瑤鑰之古青何異永嘉舊本厥藏雖少爲幸已多球璧寶之不亦宜乎五千卷撐腸文字頗笑崔儵之拒人三萬卷脫手丹黃敢羨鄴侯之插架

與友人書

一昨二三知己小飲江樓爭席有鷗蒸壺如暈解襟促坐銜杯劇談豕乃感世路之多艱悵孤蹤之安託酒薄不醉卿言始愁而足下獨軒眉鼓氣謂士不得志退求一職亦可自奮于功名之途卽不然而游謁可致五侯之鯖幕府可索千金之聘天空任飛吾何慮焉僕當時墨然意倦不復置喙夕而思之足下坐臥閨闈雄長婢僕足不出里閭寢不涉都會其不識世路之難誠無足怪也僕則囊筆半生知之熟矣知而不言足下將終無由悟則請卽昨所言之三者而述之夫相如逸才入資乃登郎署崔烈名士進錢以拜司徒階身之汚古所不免自視冠軒爲利途豕以金資博孤注黃綬長吏碧衫枝官和嶠之籠朝探毛義之檄夕下媚狐兩腳神龜萬鑽槐柳齊行尖錐競巧彼方謂筵前舞袖非無長信之猴坐上金籠不少

大卿之鵠。朝賢尙爾。我輩何傷。乃視摯詔爲本然。置恥辱于不問。其術之售者。或且得恣其威福。望若神仙。而二三骨鯁之士。轉乃落莫無徒。是非衡鑒者之不明。黜陟者之鮮當。良以孕蘭一萼。蔽蘂蔓而不芳。積沙百斛。藏寸璧而莫見。吾與子側足其閒。固將羣唾之爲不祥。力排之使失所。鳳皇萬仞。安知匹雛。孔鸞失勢。不及纖翮。此仕宦之事。爲今之所難也。吹笙楚國。墨子不損其賢。懷刺洛下。禰生不抑其氣。踵門投謁。自昔而然。服紱蘭之奇服。冠切雲之高冠。上書荊州之門。長揖李膺之坐。草賦朱閣。節帥傾心。陳詩鐵門。先達倒屣。長安如燕之客。終致青雲。車前雕龍之書。乃騰隆望。天下大矣。詎無知音。文章有神。亦堪吐氣。乃者曳裾下客。伺門陋儒。立馬廢而不慙。望車塵而卽拜。殘羹冷炙。甘之如飴。金錯素縑。匄之無節。獻錦賤之七字。但解揄揚。承華屋之一言。如膺詔命。自處旣鄰于厮下。視者亦比之賤傭。居元龍百尺之樓。設下牀以待客。享季子五鼎之奉。進脫粟以餐賓。浸成貴倨之風。象短名流之氣。昔者趙壹窮鳥。傲郡守以尺書。元度素箏。破軍門而索刺。行之今日。叱逐隨之。此干人之事。又今之所難也。孔侯嘉遜。終應安東之招。樊川清狂。乃管奇章之記。士有抱靈芬園。垂翅蓬池。幕府之依。亦固其所。然而重之以弓旌。遇之以國士。昔有其事。今無其人。以彼穹階高據。繡袞儼然。或署牘尾之名。但知金屋。或判祠曹之牒。不解龍星。以文士爲可輕。以詞翰爲末務。但看麝墨。光滿絳霞之牋。安識龍章。出自雲梭之軸。作黃江夏腹中之語。何論鸚母高才。得溫子昇海內之英。乃屈馬坊賤客。是何怪乎。翩翩俊彥。矯矯清才。甘臥窮谷之中。恥作侯門之客。故雖有名卿秉節。思播宏風。或且因鷓鴣之不逢。亦羔雁之禮絕。此依人之事。又今之所難。

也。嗟乎。滿目江山。何處平原之飲。半生肝膽。惟傾燕市之徒。白日輪馳。金門天遠。餓不麟噫。窮猿安投。我方深其隱憂。子乃恃以無恐。是何異涉一尺之波。而忘八節之險。守十步之室。而昧九折之危者乎。足下休矣。其幸毋以吾言爲過情。而以康莊視荆棘也。惟覽不宣。

蘭谿訓導陳君誄

惟光緒丁丑四月十有二日。蘭谿訓導陳君病歿於官舍。年僅五十有四。秋霜未零。量緘先掩。嗚呼哀哉。君諱煥。字子炳。號芷濱。甯波鄞縣人也。丹胄承華。縹芬紹秀。幼有奇童之譽。長僑家術之良。門庭美其溫。圭璧貞以翬。墨舌媚學。鏤肝吐辭。既推俊于一鬢。旋列名于千佛。豫章之秀。續之冠乎同門。孝廉之船。張憑僑爲理窟。覽關百氏。識鏡古初。學無不窺。舉業尤擅。唾棄蕪豔。壹軌乎清真。縵囊衆言。衷要于理。矩志挽靡。習開門授徒。蓋其時科舉之學。風氣日下。以房行爲玉律。束載籍于積塵。篠簞蚪戶。競詡新裁。折楊皇琴。用悅里耳。赤霄襲孔毛之翠。碧盧竊奇璜之光。教學相承。汨沒莫返。君乃示以正則。指具迷途。疏淪性靈。醞釀經術。法鍼砭俗。神手點金。得其一言。勝食千雞之跖。不拒來學。詎脫雙鳳之衣。象令安邱。采玉之賢。咸趨孫氏。淹中操觚之士。競誦張文。蓋著錄者一時僑盛焉。縣布再登。折翅不上。援例以教職。謁選得蘭谿縣學訓導。蘭谿者。閩越之通津。商賈所雜。襲也。袵服塞市。袂帷汗雨之場。女閩列居。跼躐彈絃之會。士之生其地者。或染于俗習。不禁冶游。然而菑水流馨之地。仁山講學之鄉。本清淑之所鍾。實秀翹之所聚。君至則宏施教澤。峻立齋條。勤白璧之刮磨。戒青衿之佻達。剛日柔日。分以經史之程。金管銀

管規爲人文之品。先生有道。弟子多才。貞志者益懋其修。贅行者亦化其質。訓蘭谿前後凡十餘年。論者謂有蘇湖之風焉。性旣綢直。雅篤知交。有青雲之氣誼。具黃金之肝膽。銅盤推食。束修之羊常捐。歧路脫驂。博士之驢可賣。若乃定傾蓋之分。風雨無輟其音。竭規過之誠。切磋不嫌其峻。此尤友誼所足重者。歲在丁卯。君奉檄攝金華教諭。詒壽亦來權司訓。與君槃肴同餐。室闈互契。旣共襟期之寫。彖訂昆弟之交。相得之歡。有逾恆等。明年詒壽調浦江。君亦回蘭谿任。隔途不遙。命駕卽達。一歲之中。展覲再三。及庚午。詒壽秋試再落。應撫軍楊大中丞之辟。校經會垣。良會彖阻。桃花潭水。千尺寫其相思。落葉蒼江。五度見夫秋色。至乙亥秋。君始以謁學使者至會垣。見訪于書局。綵雲莫合。正懷美人。清風曉來。乃覲之子。握手道故。喜可知矣。乃與展吳山之屐。放明湖之船。流連未旬。珍重而別。自是相違者又兩年。渭北春深。正寄杜陵之句。山陽寢惡。竟兆元伯之亡。嗚乎哀哉。一面之後。君彖不可復見矣。君素懷靜退。澹于榮祿。居恆下帷課其三子。琴畫一闌。花石半庭。詩心蜨催。書聲鶴聽。姬人解事。親烹石銚之泉。門生能來。亦翦夜雨之韭。名教樂地。仕隱高風。剖符分竹。非所願也。猶憶江城夜永。抵足寓樓。君爲我言白髮相催。赤轂不待。哀樂之感。過謝太傅之中年。婚嫁之期。迫向子平之多累。倘略酬夫身事。亦何戀乎微官。六十之年。必當解組言歸。耕下溪之薄田。守先人之敝廬。此吾之志也。嗚乎。區區之願。何殊乎涓流。濛濛上穹。乃靳此寸澤。虞淵景促。偏先張翰之帆。華表魂歸。虛說令威之鶴。以是言悲。慳焉何極。詒壽慨知己之云亡。傷幽途之長闕。素車白馬。終慙死友之情。斗酒隻雞。永憶生平之語。比反真于桑戶。合賦蒼來。學作誄之安仁。自

憐絲鬢。敢託豪素。用招旒旒。辭曰。

蕙波泮溲。梨峯嶽崎。璇源育穎。瑤林擢蕤。猗與陳君。學爲人師。金璧其質。麟鸞其姿。綺歲吟梅。艸辰辨稻。及乎弱冠。媵節自葆。履潔鞶素。珍寂躋道。孝友溫恭。鄉閭之表。篤志誦習。輒忘渴飢。晨禽窺案。夕螢坐衣。琅函嚶列。芸檢香圍。吸華吐粕。抉精析微。發而爲文。珠連玉錯。蘭瀋一滴。花雨四落。騰藻據龍。引響吭鶴。清奇淡濃。莫非合作。振秀陽谷。吐豔金屏。惟君之才。承明是資。奧渫不升。天風倒吹。春官三度。夏課莫辭。爰就閑秩。爰長子衿。梅花署冷。蘭葉谿深。甑寒一片。牆高十尋。珍規範士。木舌宣音。君昔講學。始于枌里。斥彼俳優。衷于義理。芬林寶車。甄海琨砥。分其片羽。莫不雀起。粹然儒者。卓哉先生。在山出山。異泉同清。祥鱣何慕。元雁何爭。有教無類。惟德之成。昔我與君。長山之隅。一鐸共假。竝室而居。是則是效。亦步亦趨。壘篋訂契。金石不渝。幽館松聲。青山燭景。紅爐煮酒。碧甌品茗。吟涼雨墜。談高花醒。殊軀同情。形忘迹屏。仙華嶧嶧。石蓮瓏瓏。始分勞燕。未阻雲龍。驢磨之迹。馬首又東。君棲學舍。我作書傭。我所居兮。吳山之麓。百尺高樓。千里極目。天長雁飛。江空雲逐。不見之子。勞我心曲。嗚乎陳君。曷不少留。十年闊別。一度來游。豈期此後。卽感千秋。魂驚旅寤。淚落江流。君篤于交。誼高秋宇。諾比千金。財輕一羽。君澹于祿。優游文圃。自甘韭粲。不羨華糈。天不愆遺。歸願莫償。峨松折翠。金刀沈銛。幸有鳳毛。濟濟成行。善人有後。克繼青箱。嗚乎哀哉。惟我與君。天涯一別。幽顯永分。心馳素旆。念結清芬。志哀表德。敢謝不文。

皋雲集序

碧雲千里。蒼江渺然。盼之子其未來。寄秋心于何處。況乃關山月落。曾鷗阻縹。候館雨涼。單燭誰語。意所欲白。安已于詞。玉璫一絨。桃水千尺。鱗羽可達。鄭重將之。夫豪素所託。致兼情文。亦有應求之士。發不由中。緝采桑牋。浮藻盈牘。真之不存。文奚取焉。彥清孝廉。驚精典籍。探奇恆岱。鼓楫文章之海。掉鞅雅騷之林。方且馳逐作者。睥睨絕業。筆札小道。宜非綴懷。然觀其澹詞彌雋。少許勝人。洪纖皆宜。骹骸盡致。婉而善感。移我情矣。是知孕珠之澤。零璣亦吐其輝。積琨之圃。寸璧靡掩其寶。皋雲一編。豈襞績淺才所得抗手者哉。僕最愛書來。每愁雲阻。得加餐之一紙。藏裏袖以三年。它日者渭北思君。江東念我。琅玕誰贈。難消平子之愁。珠玉可親。益盼子雲之札。

報陶子珍書

子珍足下。昨承手教。載誦載忻。若接風采。計借之役。首途不遠。莛名金帖。揚聲鳳飛。固知巨碩。非藉增重。然而明廬視草。制作須才。中祕讀書。昔人所貴。致身青雲。良宜努力。僕與子不相見久矣。江雲依依。每用翹結。琅函珍重。倍思故人。梅花掩關。孤旅寡緒。聊憑黃耳。略貢素衷。僕早服章縫。耽翫緹素。往以護帷之。繆盼。思答荻畫之苦心。跛鼈不前。枯螢自笑。自慈親見背。百念灰冷。雖復勉隨立鵠之班。強作曼蛾之畫。得之與失。已不絀囊。若夫破葩苑之瓊響。揚荃流之蓀橈。探寐曬之元珠。抉怒鱷之碧髓。讀頌古昔。馳逐作者。成一家之言。爲風氣之導。雖嘒星微燭。妄擬金樞之光。搶鷄弱翮。終遠錦苞之采。私衷所結。實有大願。是以雪屋連曙。一尺之檠。尙明。霜豪欲腐。百鍊之思未已。劓肝鉢肺。所不遑惜。至于攷訂遺文。規錄輿

義不揣薄陋。近亦問途。然僕以爲樸學者儒林之宏詣。文章者立言之盛業。華實區軌。精蘊竝存。故雖慕匡衡折鹿之風。亦不爲子雲雕蟲之悔耳。足下茂年石學。掉鞅詞壇。孝穆本天上石麟。陳思是人間繡虎。猶復兼綜六義。通覽百氏。參義爻之渺理。疏鴻烈之祕文。踵秀水之芳躅。爲東南之瓊寶。思欲共席研湖。晨夕奇胃互探。靈悟相發。庶幾織錦之機。睹蛟組而生巧。神鐵之用。資螭火而成冶。而乃勞燕各天。良觀屢阻。浮雲無力。難逐東野之龍。遠書可將。惟盼北來之雁。所期明年之秋。假歸梓里。道出武林。停君畫舫。就我江館。相與敞蘊胸之疑義。賞緘篋之奇文。然後招酒徒。約詞客。張陰生之旂鼓。談樂令之名理。作十日之蟬聯。亦聊以抒兩情之結轡耳。一言作券。勉誌勿忘。川途方長。諸惟自愛。

杭州重建揚清祠碑

揚清祠者。明按察僉事王公琦。刑部郎中項公麒。之合祠也。夫棧鷺同戀者。難與言峻亮之風。食鯖無忤者。不足論介潔之守。若乃皇衢蕤績。播淑于寶行。考槃寤歌。矢貞于潛曜。甘冰蘖而無悶。與羲璘以爭光。如二公者。其無媿粉閭之表。莖壇之奉乎。二公皆浙之杭州人。王公以永樂末年。由學正擢居諫垣。繡衣執法。鮑宣驅御史之驄。鐵冠立朝。安世是殿上之虎。旋歷外臺。備兵政。拜章薦士。風動金馬之門。秉憲亭疑。春生青豻之戶。散南山之羣盜。人盼朱旂。明一路之福星。惠流蒼庶。敷歷中外。二十餘年。良吏諍臣。兩無所作。項公出稍晚。素魄含彩。本是少微之星。白雲主司。乃應郎官之宿。李比部正身守白。韓員外斷獄據經。當英宗復辟之日。天順改元之初。李賢以時望秉鈞。王翱以矯情沾譽。結主恩于魚水。冠天寵于棘

槐黃閣位尊。烏臺聲噤。炙手可熱。噓氣爲雲。而公獨能效李善。孤鳳之鳴。爲朱雲斬馬之請。直節震百僚。義問動四海。卓然獨立。夙乎莫儔矣。且夫能行志者。願不存于溫飽。有勅操者。行必矢乎深廉。故二公之仕也。斫石同持。不受寸珍之餽。冰壺冷抱。兼辭升酒之遺。及乎脫屣纓綽。歸臥故山。下溪無田。衡門有水。竝能濯荆璧之縞質。絕秋塵之纖汚。采藥山頭。并謝朝廷之賜。牽船岸上。都無風雨之慮。搜從蕙篋。雙環亦付清流。庇以茅茨。一廛尙資故友。采薇吟而山鬼答。脫粟罄而孺子噉。餓麟不噬。詎仰乎落毛。涸鱗待枯。蔑泣于窮轍。乃至沒身而不渝。枕馘而無悔。嗚乎。可謂清矣。論者謂明自天順成化以來。藍猿狂寇。險嵒漸平。青鵲奇珍。重譯方謹。海氛未起。浙水無波。生非金革之朝。何取夷齊之節。又謂魯公嚴操。尙修乞米之書。陶令高風。亦作破門之請。二公苟小夷厓岸。通好里閭。不絕魚饋之歡。勉分雁稻之惠。聊資晚歲。何損貞修。終殉蟬飲之身。未免鴻毛之感。凡斯枝說。悉屬外篇。昔者令公致韭粢之謝。太常甘柏谷之餒。謝方明窮塗待稿。無改履貞。弟五韻旬日斷炊。終辭禮餉。良以浮奢之俗。罔知珪璧之修。懷一介以飭躬。冀羣頑之知感。以彼方此。異代同情。且意其時。士大夫必有積珍賂。競錯刀。鴻都通值。婆娑趨府之風。禽獻望塵。刺促拜勢之習。鶴性本潔。詎烏合之可羣。鸞飢雖毗。非桐實而安食。先哲有言。渴不飲盜泉。其斯之謂乎。二公所居。同在會城昇平巷。唐僕射褚公遂良之故里也。明正德時。御史唐公鳳儀。按浙。建坊表之。曰忠清。象附桌主于僕射祠。至嘉靖時。學史者孔公光。奏立專祠。始拓凝真之舊觀。題揚清之嘉名。聖清統序。軫念先賢。丹牘重新。禋祀勿替。寒泉菊盞。非配食于水仙。古屋椒堂。用棲神于秋社。蓋自康熙初

年重修以來。迄今又二百餘年矣。粵寇扇虐。吳越淪胥。戎燹之餘。輪奐俱燼。夫聞風而起者。百代所同。有廢必舉者。有司之責。幸糜氛之早滌。宜靈宇之重興。仁和令姚君光字于是。請于大府。卽其故址。庀凌雲之木。鳩修月之工。經始于同治某年某月。蒞事於某年某月。梅花山閣。有殊處士之祠。松柏虛堂。仍近河南之廟。庶幾颯桂旂而來下。長聆竽瑟于神絃。鸞蘭棟以騰輝。永挹湖山之秀色。旣落成。豕爲之記于麗牲之石。而系以辭曰。

空山荒荒秋冥冥。公昔作歌金石聲。渴掬澗水飢藜羹。後先相踵朝太清。星官羽衣來相迎。祠堂禿樹劫火青。芝楣重締飛雕甍。靈巫擲筭吉日貞。笙竽嘈嘈陳尻牲。靈之來兮雲英英。千歲萬歲享此馨。

縵雅堂駢體文卷七

桐屋遺詩序

悲夫。靈鶴無言。永斷歸來之羽。春蠶已死。猶留吐後之絲。念儔好于生平。感風流之頓盡。此何充所以惜。玉樹而傷。哀廬陵所以撫遺編而隕涕者也。小鳳沈君。擢穎丹泉。振翹瓊岳。焯掌竺學。鏗心吐詞。張郎長鬣。天遣裁詩。王孫通眉。早工造語。僕以葶末。有契苔岑。文字之歡。過從彌間。無何。粵寇難作。僕依張刺史仁圃。避地松谿之濱。君亦假館其家。破帽相逢。布衾可共。紅鏡說劍。黑月聽雞。幾而丁君仲泉。王君鹿亭。姚君雲伯。竝來相依。不圖風鶴之間。得此雲龍之合。或唱或和。長吟短吟。孤憤所寄。奇采互發。君騁其逸足。所得尤多。仲宣傷亂之詠。著之以哀。杜陵感時之篇。濺之以淚。和悲聲于鼓角。吐壯思于風雲。今集中所載松谿諸篇是也。越數年。君以優行貢成均。旋領鄉薦。僕亦出竊微祿。南船北馬。蹉跌莫面。而鱗素所達。雕章益工。且夫抗古之業。名山之資也。潤今之藻。天衢之華也。君旣掉騷林之鞅。兼擅制科之文。當夫糜旤電掬。芬途霧闢。當事者招俊髦于廣夏。開文社于明湖。君振袂登堂。抽豪戰蘓。鷓絲衆奏。綺桐之音。彌高。蛤珠錯輝。結璘之采莫掩。重席屢奪。赤幟獨標。薛慰農觀察。馬穀山制軍。皆亟稱之。以爲魁壘。膺值承明。丹梯之登。左券可執。何圖神山將近。天風引還。頻年琴劍。空隨計吏之車。一臥滄江。仍理洛生之詠。虞淵未迫。巫陽已來。茫茫大圓。吁其酷矣。屬者丁雪塘明經。訂其遺詩。謀付剞劂。僕感風義之猶存。傷故

人之永逝。聊爲小引。以當大招。抑又念之。君雖往矣。尙得存此瑤編。傳之藝苑。而丁王諸君。露葬早摧。墓木將拱。或秋煙等散。都無敬禮之遺文。或零璣僅存。比之吉光之片羽。以君方之。其亦可自慰于重泉者矣。

報李恣伯書

恣伯道兄足下。久不通音問。積思成疾。春閒孫子宜齏尹來。得手書。風誦三四。如親語笑。伏承東方爲郎。索米不飽。李邕作碑。輦金可致。聚書萬卷。蒔花一廬。佳想安善。箸述鴻富。甚休甚休。足下高才碩學。鳳鳴神都。四方名勝。傾蓋金臺。莫不聞聲輸心。敝廬結好。頗聞談讌。時啓琴觚。斯友朋之樂。尤人生所難。翹望健羨。何能己已。詒壽無狀。久處書局。伏蠹不出。冷螢欲枯。往者書劍初安。良朋羣聚。戴園一樓之上。與譚仲儀。王松谿。施均父。陳藍洲。張子虞。潘儀父諸君。坐則聯席。寢則對牀。朱墨之暇。相與張陰生之旂鼓。奮君卿之脣舌。聯吟石鼎之句。高歌寶劍之篇。自謂此樂。足忘羈旅。不圖數年之中。或發迹青雲。或抗塵黃綬。或橐管莫府。或仗劍戎行。時會驅迫。渙散殆盡。顧景落落。悵然寡歡。會城人海。風尙百變。跳蕩纖子。輕薄少年。競妖服以爲奇。飾畫紫以相炫。離騷未讀。已名士之咸儻。論癡成符。乃清華之自許。彼固聞道而大笑。我亦敬避之不皇。時或理機言歸。里門小住。吟社諸子。亦如星散。而生平服膺若足下者。又復一別。將十年。遠隔三千里。猶憶臥龍山麓。錦鱗橋西。與子九。文孺諸君。夕陽打槳。訪君寓廬。出新詩于哀中。酌松醪于琴畔。吟高花落。談深燭寒。往往流連夜分。踟月相送。念此情事。有同昨日。矐靈急轡。感成曩今。卜

鄰之約更復何時能遂。詒壽今年四十又九矣。出則託命乎枯管。居則抱景乎青氈。夙願全非。清寒自守。惟此友朋之樂。爲生平所偏嗜。亦若有妒之者。使之杳不可得。將復爲之奈何哉。年來家況之窘。幾于錐地俱無。兒子緯歲將近壯。尙未能青一衿。所發安貧志。潔能守素風。擁淵明之絮。我本無慙。爲孺仲之兒。彼亦何忝。長女綺。早適胡氏。女壻梅臣。食餼于庠。頗具俊才。科名蹭蹬。乃成冰玉。綺女向嘗以詩執業于足下。足下曾以三絕句題其墓。所謂玉臺詩格。傳嬌女。解道花隨燕。過壻及桃花。燕子年年事。長記題詩玉帶橋者。至今錦瑟嬌兒。角丫小女。皆伊嚶作歌曲唱也。足下聞之。亦爲之一解頤否。今冬尙須遣嫁次女。行有日矣。蕭然無辦。張赤手。擎空拳。正不知計將安出耳。卽日溽暑初退。新涼漸來。北地旱寒。順時珍攝。

書王仲瞿煙霞萬古樓文集後

大聲震咸陽之鐸。岷岳之玉石亂飛。怒鱗蹴錢唐之波。蛟蜃之青紅沓起。決雲衝霄之翮。非羽繳所能躡。泛駕逸塵之馬。非羈勒所得制。飈車挾霆。卉木當其衝者皆死。洪根裂石。螻蛄穴其中而不知。斯惟具羅星握斗之才。有走電飛虹之氣。奇胃所發。異境乃開。若吾宗仲瞿先生駢儷之文。蓋近之矣。先生生有逸才。幼好奇服。索酒紫雲之坐。浩歌紅衫之騎。談禪斂館。調笙經牀。故老所傳。跌宕可想。讀五千卷。崔嵬之書。上十萬言。劉蕢之策。久不得志。退而著述。石函祕錄。黍簡古葩。箏堂秋拍。梵林妙華。咸有闡發。其書滿家。今皆不可得見。其可見者。獨錢梅谿所香煙霞萬古樓駢文六卷而已。當其酒酣耳熱。感今懷昔。金壺

一瀉。縹雲萬疊。珠玉咳唾。風雨呵叱。混混乎。袞袞乎。不自辨其爲瑜爲瑕。爲朱爲碧也。其靈澤祠碑。董賢廟碑。哀江南。蕭后論。諸篇。恣其瀾翻。以此雲譎。誠令腐生掩耳。斥爲趾離之寤詞。小儒橋舌。詫爲海藏之怪牒。然而以韓非之孤憤。爲莊叟之寓言。其文愈奇。其心則悲矣。余少時有手鈔本。恆喜讀之。竊謂其言龐而失純。其體詭而越軌。然鼓其一發不可遏之盛氣。以行其一決不暇擇之浩博。所謂龐且詭者。若鉛之鍊而金。糝之融而糜。直與之俱化也。混沌無眉。天地皆紫。好之者病。學之者死。蓋自有茲體以來。未有奇橫恣肆若是者也。比荆門有新刊本。陳藍洲大令。購以寄余。重讀一過。因泚筆識之。而重有感焉。吾聞先生邃于史學。好言經濟。明治法。諳掌故。使得列身丹序。振徽紫微。豈不能宏措施。議禮樂。頡頏董晁之林。揖讓夔龍之列。況乃學兼兵家。善有手臂。猿公之伎。騰蹕若神。虎鈴之經。變化在我。熊渠狀虎。早擅飲羽之能。景宗逐蠻。能馳如龍之馬。鼓鞞忽動。師旅寄之。建蜃弧。張雕弓。出蜚狐。踰白龍。亦何豕不能血。尸逐。膊溫。馮李將軍。無雙之才氣。博班定遠。萬里之侯封。而乃文不能註名于朝籍。武不得蕤績于邊庭。跣弛放宕。以終其生。獨藉此一寸錦心之血。傳千秋畸士之名。不亦可慨也哉。

李輔堂中丞三歸權圖序

夫輪鞅皇途者。阻賞于巖壑。羈組縫掖者。局迹于衡閭。然則償縱游之願。其亦由福慧之鍾乎。長沙李輔堂先生。珠水神光。瓊嶽秀氣。青年建節。黑頭抽簪。采藥雲深。尋煙林迴。持仙人九節之杖。腰腳未衰。志名山五岳之游。襟期自遠。言探勝迹。豈作浙游。浙固多佳山水。而奇麗幽特。爲東南冠者。有三山焉。秀出東

溟峭凌南嶠。赧光純赤靈氣之所鬱。盤桃花古春。仙真之所棲息。則台之天台山也。茗亭插玉。窈窕浮煙。深洞鳴濤。答諸天之鐘鼓。法雲出岫。朝大海之魚龍。則甬之普陀山也。若乃砥厓雷吼。景落銀河之波。迴峯翠寒。秋淨玉池之水。雪練萬古。雲磴百盤。有雁宕之靈奇。實甌江之形勝。是三山者。洵乎冠羣峯而獨絕。爲游客所樂談。擬以神山。亦圓嶠蓬壺之列矣。先生既飛湘水之帆。熾明湖之權。舉首天外。揚舲海東。采芝之侶。相攜夫二三。踏雲之蹻。往來乎千里。于是屏車騎。挈尊檮。履巖巒。穿窳窳。濯足石梁之流。振衣夫容之頂。狎頻伽之翠羽。翫靈湫之玉龍。皆擘窠大書。磨厓紀勝。鬱熊虎之偉狀。壯登陟之大觀。先生遊磨厓留題天台曰。天下第一峯。雁宕曰。天下第一瀑。普陀曰。海上仙山。月旦定一字之評。宕以奇勝。識者謂非親歷不能道。煙蘿得人外之趣。幽賞既徧。奇句滿囊。乃揖洪厓。別浮邱。泛鶴首。乘長風而歸。蓋自辛未徂壬申。而三山之游始畢也。爰託縑素。傳之丹青。集芬苑之雕章。增海天之佳話。詒壽竊惟先生湖海豪氣。軍國鉅才。抽颿急流。蠟屐名岵。登高岡而極目。窮遐覽之浩渺。寰宇無塵。煙水一碧。迴思當日者。際中原之多事。屹江表之長城。開府視師。揭旌仗鉞。雷鼓四動。羽檄交馳。入耳皆譁。鉦之聲。觸目盡戈。鉞之氣。當必快澄清之再見。慨人事之易遷。而東望滄溟之中。鴻波浩蕩。鱣鼉鼓腥。番舶上下。諸島隱見。得無有與博望乘槎之懷。動楊僕樓船之志者乎。竊又聞之。風雲之變。吐納之機也。江山之美。文章之助也。在昔龍門放迹。探崆峒禹穴之奇。麟經繼言。發金匱石室之祕。比者先生亦有徵獻錄之著。固知靈源所會。雄才益拓。標史家之別幟。爲一代之鉅觀。千秋之業。古今輝映。不更盛與。承命爲文。辭勿能獲。載欽宏抱。勉綴儂篇。尋李謫仙夢游之境。我

不免青山見謝。想謝太傅邱壑之情。公須念蒼生久待。

報孫子九書

退叟足下。書來詢近狀。殷殷厚意。雒誦生感。壽與足下。別又三年矣。前者虎林見訪。良愜鄙衷。乃以病軀。不能與足下踏吳山之白雲。尋西冷之晚桂。爲歉然耳。自爾以後。病日加劇。偃息衾席。豕至歲闌。壽植幹雖臞。得氣非薄。猶憶結世東臬。聯吟宵館。開壁壘。張旂鼓。往往雄雞三號。慶戰未已。諸君多意倦乞休。而壽方拙思騁豪。賈其餘勇。又或探梅前邨。尋碑野寺。三里五里。朝行夕行。輒同黃犢之健。無藉蹇驢之借。斯皆足下所與共者。曾無幾時。衰弊日增。偶致深沈之思。則心同旌搖。小展流連之步。則氣甚牛喘。良由數年以來。積疢莫瘳。兒女之事。煎迫日亟。愁能銷骨。病易成翁。潘鬢告秋。江花欲墜。如何如何。今秋一利。幾死。鬼伯見舍。復存人間。上冬之月。屏體未復。又遣嫁次女。壽旣無淵明下溪之田。誰應陳湯鄉里之句。雖賒田孃之布。惟製青裙。織女兒之箱。但須黃竹。而蒼玉小璣之飾。詎能盡捐。漢書木屐之風。難行今日。加以賣隱之之犬。廚帳誰供。牽敬弘之羊。禮不可廢。一事之集。一物之細。動須阿堵。輒復周章。今雖竣事。而一氈長物。都付長生。百衲古琴。亦售賤值。力已瘁矣。困亦甚矣。歲聿云暮。北風振厲。永漏無寐。憂何能已。忽復念里鄙之中。戚舊之內。往往素髮垂領。黃口始嚙。五嶽空襄。百年易邁。而壽纔近伯玉知非之年。已駮向子生平之願。則又自用解嘲。翻然而喜。凡此裏抱。惟可獨喻。苟非相知之深。如足下。亦豈足舉府。鬲以相告邪。楮墨之事。日益荒落。友朋良覲。渺若雲天。卽日尙須西渡。謀卒歲資。心緒煩劣。草草佈臆。不

盡欲言

陝甘總督相國左公七十壽頌

皇帝御宇之五年。龍堆拓地。鯁海從風。九塞無塵。八埏洽慶。于是陝甘總督東閣大學士左公春秋六十八矣。聞之有經天緯地之略。必有難老之厚植。以濟之。當提釐襲慶之朝。必有曼齡之碩德。以輔之。在昔龍紀分官。雲師命氏。鳥明爲建福之主。天老握乾籙之符。夔乎遐哉。莫得而尙矣。若乃白旄奏績。昆吾銘尙父之勳。黃髮調元。靈壽錫師臣之杖。羅侍中歲躋耄耄。管庶事三十六曹。郭令公身繫安危。歷中書二十四考。江東宰相。蛇鶴徵其長年。潞國精神。龍馬同其天賦。咸皆騰綸扉之美譽。播紫殿之淑風。翼翼贊贊。麟烏乎百世。公東垣上宿。中湘偉人。才兼九能。學包百氏。經綸握于掌內。甲兵藏之胷中。起家孝廉之科。高議征南之幕。屬粵寇滔天。妖氛匝地。兵連吳楚。旤結東南。公以成鄉辦賊之才。爲留侯借箸之策。銀刀練士。熊羆成山岳之軍。神筆運籌。蛇鳥變風雲之色。揚旂乎鄂渚。振旅乎衡陽。露布上其勳勞。黼坐識其姓氏。乃受文宗顯皇帝特達之知。擢自幕官。升之顯列。冰銜屢換。玉節旋頒。不二年。兼拜巡撫浙江督辦軍務之命。蓋咸豐十一年十二月也。未旣擢督浙閩。仍兼巡撫。時則雲霾風嶺。火炤疆江。百城哀角。鮮老熊白棒之當。千里雕旂。甚飛燕黑山之衆。公馳驅許國。慷慨誓師。審形勢于山川。建大將之旂鼓。分命將領。激揚武怒。羅平妖鳥。先驅東浙之氛。天目飛龍。進占西吳之利。祕策運而神鬼會。長鞭指而士馬騰。如雷如霆。大鞞大膊。全浙旣靖。鼓行而前。殲南邵之竄孽。五領飛旌。截東走之殘氛。三江飲馬。惟茲狂寇。

恣彼披猖。虺張十餘年。蛇食萬餘里。一旦風卷電掣。霧滅煙銷。昔者晉公仗鉞。淮西之功首歸。光弼行軍。中興之臣弟一方之今日。何多讓焉。旣而朝廷以西陲不靖。移公督陝甘。虎牙高建。馬首初臨。先率諸軍。會勦逆稔。事平象覲京師。鳳城按轡。選上廐之龍媒。象簡朝天。對玉階之仙仗。溫綸稠疊。寵禮有加焉。且夫荒僻之不勞遐征者。窮漠以象鳥獸也。巨憝之必彰天討者。平世不容羆狼也。逆回犬羊。餘孽狐鼠。爲羣窟營。蔥嶺本爲釜底之魂。醜結花門。屢扇旄頭之旆。國家軫丹野之慘。視朱崖之捐。偶湯斧之稽誅。益堯天之自外。虔劉我邊境。侵占我封圻。銅鼓雷鳴。金弧夜掩。民口恣其驅掠。出沒任其跳跟。公躬承帝命。統旅專征。黃鉞一麾。墨雲四裂。百戰百勝之略。九天九地之兵。寶劍橫磨。盜壕迅剗。秋風玉帳。仍飛都護之書。夜月金笳。重固靈關之守。于是隄高闕。指昆伊。踐飛狐。蹴烏盤。陰山急雪。飛騎先登。古磧黃雲。異軍突起。悉復開邊之故地。進犁老上之龍庭。竇將軍勒燕然石。無此威聲。霍嫖姚封狼居胥。遜茲遠略。龍驤虎步。揚我皇靈。東瀉西除。連平大寇。天子嘉其功。剖青珪。進黃閣。泐鍾銘鼎。懋矣盛矣。公外宣壯猶。內存宏濟。用兵之隙。敷政尤勤。卽其大端。蓋可略述。當戈馬紛騰之後。正斯文凋落之時。人鄙談經。俗多佩劍。公以爲詩書者。布化之基也。人才者。爲治之本也。故其在浙也。青編校字。首刊甲部之經。其在陝也。秋賦徵才。特創萬閒之夏。賢者之識在大。正政之首惟儒。而士氣于是乎振。戎燹所及。鐻罇勿貳。加葭戾之頻。仍致凶荒之屢告。甚矣其憊民將何堪。公郵鄰援南楚之饑。何雷絳舟之泛。發粟周西秦之困。不惟金帶之施。賦餼粥于都亭。無限乎千戶萬戶。捐祿入于餽歲。奚域乎損四損三。頌徧殘黎。春迴大地。而民瘼于

是乎起軍興彌紀政令不修百里之長再命之吏或縱情于橋度或委心乎忽快公冰清率下鏡明照人所至舉廉能察昏墨除其陋弊勒以規條南陽埋狀之上賢令于以遷階趙郡威惠所行狡吏因之改貫列州仰其風鯁百職畏其霜稜莫不競厲新圖頓翻故習而吏治于是乎飭至于今者天涯息戰絕幕開疆撫萬里以推恩遊羣僚而分職莫不宸謨上稟碩畫宏抒于是秋簡三軍棄障嚴黃花之戍其定兵制也有然春濃五柳脫甲拜靈星之祠其講屯田也有然沃野美因渠之溉鴻陂導流則有興水利之政焉重金置通養之民龍精浴種則有教蠶桑之政焉鉅綱既舉德風載揚豈特雲開玉壘重賂漢官之威儀家令化洽氤氳其沐熙朝之雨露斯尤中外敷一視之仁創置垂萬世之利者矣以洪伐若彼以茂績若此加以公忠體國翼弼傾心嘉謨屢告安人濟世之誠奏草爭傳杜斷房謀之望允宜光生上袞慶集繡裳霖雨造蒼生之福百祿天酬旂常仰奎翰之褒期頤帝祝屠維紀歲良月應時豫開七秩之觴重拜九重之賜幃門將吏鏡吹騰歡幕府賓僚詠歌摘藻凡夫振纓佩玉之倫以至被褐負耒之衆罔不額手稱祝翹首傾忱某等浙水鯁生海邦下土迴瞻鄉國曾蒙再造之休載盼旌幢倍慕仁人之宇恭逢令日遙企崇階欲以方瞳鐵齒浪進浮詞固知玉固金堅偏鍾駿德香縈畫戟願長開益壽之花墨蘸金壺敬上獻恆春之頌其辭曰

絳霄鬱靈黃宰儲珍元氣鼓蕩篤生偉人補天浴日爲柱石臣義奮爲秋仁育成春惟初東南妖火四照連城虎踞積歲鷓鴣叫吳越之區腥氛誰掃公滌蕩之乃返熙暉西北構亂民困勿紓惟公仗鉞載馳載驅

青犢虬黨蒼鶴醜徒妖靄亂領胥歸芟屠乃展虹旌仍拓麟甸區脫無胡衣冠復漢公之天威百世稀見
春度玉門令肅金劍金劍煌煌玉門堂堂千里萬里無外龍荒煙鉏隰草雲栽陌桑招彼黔兆適茲樂鄉
匝宇欽風緜區被澤緝福天降寵命帝錫凡百士庶莫不感悅謳吟禱祈如月如日日升兮月恆世曼壽
兮樂昇平春融融兮無既瞻望鈴閣兮願獻瑤觥維南有極西長庚祝公眉壽三千齡

送門人余遠帆歸新安序

新安余生遠帆古香觀察之孫也侍祖庭之杖履隨宦轍于浙中謝郎竟體疑有芳蘭陸機少年已擅賦
筆虛衷好問竺嗜篇籍僕時以校經居會城之戴氏聽園遠帆亦假榻焉猥以老馬之識象執元雁之幣
晨露沐硯夕蟾瞪幃研朱勘經浮白讀史奇字待問愧非子雲之亭忘年可交乃結何郎之契破索孜孜
無閒暄肅明年己卯維夏之季將以省試赴金陵象歸新安舊居束被囊書倦焉告行渺白雲其滿江瑟
秋風之將至舉祖觴于花下索臨別之贈言僕嘗謂士生世間不越出處兩途魁墨榜排金門扇芬承明
揚聲紫微奉屬車之清塵奏卷阿之浩唱青雲致身誠足自豪然有一境也家承詩禮地擅湖山有慮足
以蔽雨風有田足以給衣食門鮮俗客架富良書于是乎攷鏡輿圖覽古今成一家之言訂名山之業
是亦士人之極遇吾儕所難能者矣故今日以科第期遠帆誠人情之恆亦意內之事而僕之意則更有
進者夫女媧搏人半皆黃土儒冠多阨常泣青衫于千百人中獨賦以冰雪之質生之清華之門遠帆之
得天良厚加以居重蔭之下無流俗之好雅志習靜抗心希古則益將閉宇文之戶燃思禮之燭漱芳潤

于菟園咀精英于藻區。庶尙友夫古人。乃合軌乎作者。然則區區一科一第。又何足爲遠帆榮哉。遠帆勉旃。士不患無名。而患學不成。得失勿挂。襄吾益葆。吾貞僕固知遠帆之志之有在也。故以一言贈其行。

黃烈婦誄

烈婦曾恭人新淦黃文學之室也。璘苑朗姿。翠水仙魄。縹緗世胄。幼讀大家之書。窈窕清閨。長流淑女之懿。年十九。歸文學君。寶釵既燦。覲君子之光儀。珍服勿夸。有林下之風範。拈蘭箴以佐讀。洗莢手以調羹。尊章意愉。娣姒美合。旣而文學君之兄黼堂太守。服官于浙。舉室從行。雲天浩蕩。阿鴻先見其高摩。靡舍東西。士龍不嫌于共止。落花庭靜。卽是竹令之原。玉軫聲調。不奏雉飛之曲。何期綵雲易散。罡風橫吹。天上樓成。人間寢短。茂陵一病。馬卿無復起之時。風燭一朝。庾信有傷心之感。蓋文學之歿。爲咸豐丁巳正月二十八日。其年僅三十也。恭人傾河有淚。呼天無門。身百死其何辭。腸九迴而靡已。素帷風冷。麻衣之泣何人。錦瑟兒嬌。黃嬾之嗔方亟。此則相從之志。白日旣炤。其精誠未亡之身。餘生暫寄乎旦暮者也。踰年茹痛。入地尋盟。卒以戊午四月二十七日。自經于甬江官舍。白壁可碎。黃金不渝。漆室霜濃。泉臺月滿。烏乎哀哉。夫女節之亮。殉軀爲上。要其所致。不無少區。昔者精感連枝之木。迹留摩笄之山。皮金翦字。玉骨餘死後之香。粉筆題門。銀鐙炤未成之畫。何嘗不著清芬于彤史。邁喬節于青陵。然而隨雄單鵠。效共命于倉皇。投海冤禽。迫在山之羅網。未有桐樹挺半枯之枝。柏舟蔑見奪之變。從容盡職。慷慨捐生。如恭人者。可以謂之烈矣。可以謂之難矣。浙大吏旣上其事于朝。榮以綽楔。今嗣君學良。復分司鹽運于浙。同

社友會稽陶君文冲。近託密戚。追溯清徽。以爲浮生一時。跨節千古。揚茲懿美。實資藻詞。乃次其事。略屬爲誄言。詒壽受簡。莫辭循文。起敬素旒。何處層城。渺仙馭之雲。芳軌長留。鏤管補貞姜之傳。其詞曰。淦水洋洋。旣清且漣。珠源鍾淑。瑤葩濯鮮。乃生女貞。坤儀穆穆。紛其內美。含芬佩馥。嘉偶曰妃。祥女來歸。無雙叔度。家術之輝。星窗警晨。繡鏡坐夕。勸我夫子。勤此芸帙。兄伯出守。盡室偕行。梅鶴眷屬。金玉友昆。甬江迴青。越山聳碧。雁行旣聯。鷦翼不隔。巫咸忽下。鬼伯來親。通眉無壽。病骨不春。濛濛上圓。胡酷至此。哀哀未亡。計惟一死。一死固甘。忍死非戀。古水湛曾。熱淚洗面。撫孤獨湣。忽忽踰年。畢命素練。相見黃泉。黃泉兮有知。相見兮勿悲。夫容城兮花離離。寥瓊英兮有所思。所思兮何處。咀冰蕤兮瑤池。蘭何馨兮玉何墜。婉衿見謫兮來人間。人間不可以久住。從夫君兮雲袂。躡蹻遺燉烈兮千祀。緜清風兮後昆。永傳。

蕩絲詞序

蕩絲詞二卷。續溪汪君詩圃之所作也。余未嘗識汪君。門人休寧余遠帆。數數爲余稱君賢。且精倚聲。則心焉識之。庚辰夏。遠帆自其鄉來。彖攜君此編見示。且述君意。屬點定而加弁焉。夔蘭展卷。奇葩豔眸。若乃翠屏春悄。玉鑪香溫。明漪鏡花。媚闌角之衫景。小扇兜絮。墮簾尾之蜨痕。其婉麗也。斷紅怨雨。零香怯風。透斜月于碧紗。瑤瑟獨語。阻洞房之秋窈。銀鐙無言。其悽惋也。加以薄煙乍銷。山翠淺于新竹。秋病初可。人瘦比于黃花。其疏倩又如此。蘼蕪千里。吹角夕陽之樓。夫容隔江。打槳西洲之渡。其緜渺又如此。此其寄紆迴之思。發婉轉之聲。有芳潔之夙儲。謝叫喚之偶涉。充其所詣。蓋駸駸乎分蘭畹之香。吹梅邊之

笛矣。吾聞續溪大好山水。石照之麓。翠眉之亭。二蘇之遺迹在焉。讀君之詞。想君之所居。又安得于溪光嵐景中。攜松淥之一瓢。款深柳之十笏。捉枝代塵。掖帶坐花。與之論協律順度之微。究意內言外之旨。探風騷之靈源。極聲情之眇趣。爰乃發浩歌。騰清唱。當必有操縵動衆山之響。刺船移海上之情者。嗟乎。奏瑤笙于天上。君定詞仙。悲落葉于風前。我原秋士。鬢絲如此。綺語將除。愈唱愈高。勉惟君子。

許邁孫重刊靈芬館詞跋

邁孫先生。靈抱浣月。吟吻粲花。握雲機之九張。是工衆製。疊水調之百闕。最擅倚聲。漱玉液于露葩。紉蘭馨于秋佩。冥契獨結。靈芬是師。古佛之事。鑄同黃金。私淑之僑。鐫之翠琬。邁孫于國朝諸家詞中尤嗜類瑤杼所出。瓊絲合奏矣。海桑婁變。雲葉匙遺。先生慨焉。乃發襲芸之藏。付雕梨之手。仍其三種。合此一編。爰以校字。得快先覩。夫緣情造端。導源樂府。令慢代擅。風騷未亡。洎近世之名流。亦清辭之踵起。然或銅絃鐵綽。寄情于豪宕。融朱冶粉。刻意于娥曼。於其一體。終成單絃。吳江扇微。郢歌應節。抗墜善變。婉轉工思。緝冰緒于衆家。激霜亮于空吹。疑前身爲明月。是芬途之導師。墜響不振。來學安式。先生是舉。不甚盛與。抑又知先生架富琅函。性耽瓊祕。凡昭代諸家之詞。或有流傳未廣。珍鏤已灰。莫不搜篋裏之新聲。訂梅邊之小譜。玉牋親寫。綠笈深緘。自茲以往。意且以次付刊。庶幾棲塵秋瑟。竝調待絕之朱絃。入手元珠。彌煥未沈之縞彩。則是編之出爲嚆矢矣。僕也早嗜言情。粗知按譜。宗風未昧。願同一瓣之心香。文章有神。請以斯言爲息壤。

生春詩錄序

生春詩錄一卷。凡詩三十首。己卯歲暮。黼堂先生詠懷憶舊之作。其體則效元白何處春深好也。先生以青蓮金粟之身。抱鄴侯鑲子之骨。辭榮早歲。樂志清時。借琴歌以爲娛。合羅袞以一視。笠屐入畫。巖壑多情。固已心寄崇霞之表。人羨地行之仙矣。然而碧山學士。雖銀魚之早焚。玉局詞豪。耿瓊樓其終倦。其忠愛纏緜之思。篇什之中。恆三致意焉。風雪歲闌。擁爐人靜。載酒之客。今雨不來。探梅之驢。泥滑沮出。獨酌不醉。隨感成吟。蓋其爲名臣之後。抱宏濟之才。拜命殿前。樹績江表。持英蕩而按部。舉赤帷以行春。南樓風月。庾元規開府之年。官柳旌旂。陶士行督師之日。迴首春婆之癡。故忘聖主之恩。泊乎秋風移病。湘水歸帆。雲中采藥。卽是神仙。海上看山。皆成圖畫。先生曾徧歷天台雁宕普陀之勝。繪三山歸權圖。付鳳毛于賢嗣。結鷗舍于明湖。野亭問柳。豈無聯騎之賓朋。松風掩關。大有著書之歲月。閑身許乞。容老子以婆娑。憶事興哀。得風人之旨趣。故其清響。良玉環采。鍾霞杜浣花之雄才。事惟直寫。劉文房之嚴律。比之長城。視彼汎緝。巖花浪填。月露蛺蝶成體。麒麟號援。曾何足當吹劍之一映乎。詒壽秋士愁多。冬心冷抱。辱承授簡。聊綴小文。敬云引喙之簫。竊附前驅之弩。蓋一再諷誦。已不覺春氣拂拂。從豪叻閒生矣。

縵雅堂駢體文卷八

九招

敍曰。靈均善怨。歌楚些以招魂。宋玉工愁。賦悲秋于九辯。言之長也。寄所託焉。僕以下才。拙于詭遇。念美人之易暮。嗟羈旅之無聊。大江蒼波。渺孤蹤其安寄。靈秋白月。耿申旦以不暝。不無愴悅。安默語言。用效吳客之設詞。仍段巫陽之本旨。成文十首。命曰九招。匪欲爭玉軼于騷林。亦藉寫瑤情于鏤管爾。

潛虛子戾時遷俗。沈屯倉狼。排荆進棘。動得咎殃。乃飛神乎寥邈之域。棲景乎杳冥之鄉。結山鬼以爲伍。蔽元霧以自藏。謝溷迹于埃壤。寧隨化于大荒。于是眞宰聞焉。乃告元修大夫曰。若有人兮。獨立離世。吾欲招之。俾如厥志。子其爲我善辭以道也。元修大夫乃載曳星之旌。策籊雲之騎。凌蒼茫窮幽邃。造潛虛子之所居。而請曰。吾子擢丹瓊之華。抱皎璧之質。龍章鳳姿。閒世而出。達則淑風宣于王途。塞則貞修尊于磐室。將使良道寶行。爲時楷則。何爲寥寥蕭蕭。踽踽涼涼。棄冠服。捐文章。周旋乎飛燐之野。儻何乎跳狴之場。隔昭途而寂處。付恆幹于若忘。今者吾以眞宰之命。招子。幸子明以告我。潛虛子曰。大地搏搏。闢此世路。張機設網。不可以步。況吾之生也。若緣蝨。若綴旒。鬱煩居而雜處。徒行歎而坐愁。誠不若委吾身于亡何有之天。逐太虛而優游。大夫曰。不然。此子不得志于時之說也。今承嘉命。將沛厚澤。厥有數端。惟子所擇。潛虛子曰。唯唯。願安承教。

大夫曰。今將俾子以投時之筆。奪錦之才。步鼇峯而金蟲。題雁圖而墨輝。袍柳碧染。巾花絳蕤。曲江之翠。幙高列。天街之寶馬飛來。于是措象笏。振玉珂。瞻龍袞。拜鸞坡。青簡領著作之鉅。朱絃奏頌聲之和。朝趨則芝鼎香近。夕歸而蓮炬光多。迴翔禁林。出入臺閣。既厭承明。爰拜牧岳。紐金龜而右顧。節玉虎而高擢。奏鳴笳以清路。列畫戟而衛幄。象乃飭威儀。踞穹隆。鵠峙絳裾。鱣鏗華鐘。高轅始啓。百職趨風。畫諾成風。噓氣爲龍。威令暢乎遐邇。榮問扇于華戎。秩進八州之督。恩加萬戶之封。旋就徵乎丹詔。更入輔乎紫宮。黃扉元老。黑頭三公。領十年之宰相。乃初服而雍容。此誠極人生之快意。當亦吾子所樂從。

潛虛子曰。紫魚結佩。紺絨據席。尊則尊矣。不如檄帶箕踞之爲逸也。虎毛簇騎。鶴氅憑軒。赫則赫矣。不如鞞履徒步之爲安也。若乃星榜魁彥。霓裳衆仙。瓊瑰竝列乎鑰石。鸚雀雜襲于芝田。尤志士之所浩歎。古今之所同然。若是者。非吾之所願往也。

大夫曰。有一境焉。穹資雄據。敦業坐操。甲庫乙庫。黃標紫標。綃彌南山之樹。金編北邙之郊。登碧縹而莎積。窟青礬而綺交。較珠璣以衡石。充琦珍于櫬椽。用能陂池擬海。蹶角量谷。連邃窳以堆紅。繚修龍而漫綠。錦衣之僮千指。雕華之車百轂。乃結翠龍而開宴。評青鴝以呼賓。門趨珠轂之客。廡走碧鞞之羣。騁錦綺而雜襲。鬪奇貝以璘彬。則有拜車塵。仰顏色。媚行煙視。情態百出。勾貨紛紜。陳請幣驛。爰高坐以指揮。舉千金而一擲。此亦足以吐一時之氣。令世俗望之而嘖嘖。吾子其能勉爲之往乎。

潛虛子曰。東海豪客。西蜀鼎門。盛衰隨化。倏嗻駸魂。賜拜銅山。家傳金穴。曾不轉眄。委骨荆棘。且夫驪風。

勺飲不須江河。一人之身所糜幾何。徒累貞醜之德。或貽爭攘之戈。故宜聖有貴乎貧樂。疏廣無取乎財多。子以是招僕。其以僕爲附羶之蝮乎。

大夫曰。然則富貴皆非子所願矣。抑子亦未知富貴之樂耳。爰有芳壇鏡砥。重櫬玉闕。朱鷺窈突。碧敞隆夏。閭崑崙兮辛楣。堂昉昉兮蘭房。繚壁則銀蠟塗椒。連樓則銅鱗學瓦。其中有澗寮洞月。元鋪鏤雲。金釭垂帶。藻網承塵。頽璃帖牖。翡翠緣門。仙靈螭鳳。圖畫繽紛。雕櫳之鈿五色。黼屏之綺九文。葩毳綠而窠鶴。流蘇絳而走麟。亦有離榭柳藏。別苑花啓。珍叢蕤素。琅柯綴紫。翼高亭以虹鳶。轟畫岑而鵠起。嘒蒸架之翠衣。泳芳沼之朱尾。象乃步展。瑟塵坐移。桂席春風。憑排闥之晨。秋蟾翫綃曲之夕。道暑則涼堂黃簾之牀。避凜則邃幄紅爐之室。有境皆仙。惟吾所適。又何羨乎天堂半千之居。香風楚客之宅。此宮室之美也。吾子亦願處之乎。

潛虛子曰。高棟冠雲。金漚耀旭。以濟物論之一蓬戶而繩樞也。連街竚窳。包山增盤。以幻景視之一賁如而宰如也。結菲可以蔽風雨。支藜可以適躄魂。何朱門之足羨。何藻飾之足云。若是者。吾不願往也。大夫曰。不但此也。復有紅妝趙女。素而燕姬。輔小桃潤。鬢曼蘭欵。秀螯宛頸。修蛾曲眉。纖穠異態。姱淑千儀。或蜨裙而銀泥。或蟬衫而金縷。帶颯颯其錦鴛。翹飛飛兮翠羽。乍煖光以眇視。脈淺笑而無語。旋含態以徐前。光旅進而有矩。于是調瑤瑟。絃繡箏。嘒紫篴。叫玉笙。縈迴采菱之曲。激楚揚荷之聲。竹枝之越調。閒作子夜之吳歎。亦呈。裊文梁之靡均。遏綵雲而不行。旣而蠻蠶節促。迴鸞袖揚。返靨宛轉。擡袂低昂。悅

利屣之步。恹乃輕軀之風翔。既孤騫而飄忽。又雙進而頡頏。洛水驚鴻之景。金谷倒龍之裝。蹴飛英而點席。蹙廣餽而皺香。俄焉日落。華堂莫迥。衫色花融。釵光月引。甲煎騰煙。蘭膏交景。迷離恂恂。不可殫盡。主人顧笑。珠評翠品。咸悅魄而美魂。爰飛觴而擲錦。此聲色之盛。或吾子之所樂乎。

潛虛子笑曰。折鬻齟齬爭纖妍。豔歌嗚嗚世所憐。箏琶之耳洗不得。白雲何處湘娥絃。且吾翫麗華于雲鳥。聆琴筑于澗泉。高舞鐵如意。長歌明月篇。海波爲之噴涌。林鶴爲之盤旋。又何必車子獻伎。審姐當筵。紛耀節之雜襲。始足爲之流連乎。

大夫曰。又不但此也。聲色既盛。服御尙矣。冠子以縞璣纏蟬之冠。曳子以綠華飛翮之履。繫子以黃金耀麟之鞶。佩子以青珊盤龍之璐。粉粉褙褙。被服生光。春則萋組霞襲。芊縠風揚。夏則輕紗雪皎。織紈冰涼。時而秋也。金絲薄扈。纈纈雲而郁郁。時而冬也。元裘豐雍。騰鬣采而煌煌。加以珂雪塵裝。羅緋囊繡。搭膝鏤肥。串臂麝瘦。控寶轡以電飛。嗽玉鸞其風鬪。紛挾裊以擎箱。爛翁赫而馳驟。言入其室。玢玢琳琳。茱萸百子之帳。夫容七襄之衾。鴛綾之被。桑翠。鵝茸之褥。展金瓊筓。直溢璣絡。荔紅。蓮幰重幘。香霧晝陰。縣玲綴杓。微風振音。此服物之都美。亦生人之所欽。吾子其有意否也。

潛虛子曰。芰衣容裳。三閭氏之初服。麋裘緇布。晏大夫之高風。若乃麗衣珍飾。猗靡蒙茸。斯飛蜚之楚羽。非大雅之雍容。吾願不及此也。

大夫曰。又不但此也。爰有鄴中翠蹏之駝。洛下錦尾之鹿。唐宮紅蚪之脯。漢苑青蛟之肉。猩唇凝脂。熊白

剖玉雀。領秋黃。鳧翁春綠。梁谿文鯉。頰鱗卅六。醴泉朱髓。百碧珠簇。于是召饗之。飭中庖。滌霞綺。揮霜刀。蒸蘭蘇。韓桂瓢。芫香點醢。花紅糝椒。綺肌糜而芬沃。膩雪膚飛而金槃高。郁四溢之嘔菲。齊五味而和調。而乃陳幸盞。啓駢筵。招賓朋。羅珍鮮。犀角橫筯。龍頭飛泉。蒲桃鄠醪。瓊椀銀船。嘉醕鴻進。異品蟬連。加以御宿白粲。盧城香米。蒸以爲餐。皎若雲子。兼織餅之甘滑。又瓊糜之輭美。竝足以潤華池而益津。鬱清醴以留齒。此所謂極天下之滋味。雖麟廚鳳庖。無足與比者也。吾子貧瘁之士。麇食醋餐。口不知大官之味。腹惟充黃齋之香。其亦願往享之乎。

潛虛子曰。行庖燔燔。夥炙絞清。吾以爲肉食之鄙。不若菜羹之馨也。方丈衍衍。棟珠選玉。吾以爲飽厭珍羞。不如飢甘脫粟也。況乎鯉濃杏進。疾之所藏。天物暴殘。聖之所傷。故老聃戒口味之爽。顏子樂簞瓢之常。吾子休矣。吾豈以口腹之奉。移吾心乎。

大夫曰。嘻。吾誠不識子之何心矣。雖然猶有一境。請更爲子言之。若乃貴承都護。住近居延。以射獵爲勤。播領部落于控弦。白草朔野。黃雲胡天。美盧振毛而欲奮。猛翻決風而待騫。于是驅追騃之輪。選飛雹之矢。伐輓雷之鼓。建旆虹之幟。或縹或緜。亦步亦騎。包崑布圍。擊宵張翳。高煙飲飲。礪駭天地。爾乃麟豪豨。剖貪狼。腦斑鹿。肉黃羊。雄羆魄失。修挺走僵。猊顛飲羽。虎蹶逸俚。恐懼辟易。莫可潛藏。亦有掠莽朱鷄。沖煙蒼鶴。俊鳶霄戾。焦鳳雲啄。宛冑糾亂。紛錦飄泊。弓無虛鳴。應聲而落。旣而肆若蘋。布帷氈。銀罍淋血。金刀割鮮。胜炙崧磊。桐酒灑連。蕃兒碧袖。羌女冰絃。嘈嘈棖棖。踴踴躑躑。絡驛勸飲。如鱣吸川。然後縛生藉。

肉振旅言旋。計禽行賞。刀綺滿前。華鐙宵宴。鏡吹喧填。斯豪士所快意。極田獵之壯觀。或者吾子之所樂。從者其在是乎。

潛虛子曰。餓鴟箭。辟列弓。騎快馬。如游龍。渴飲黃鸞血。耳後生長風。此固曹景宗所謂樂而忘死者也。然吾人之生也。託身緹素之業。揖情道藝之塗。則獵麟鸞于芬苑。羅瓊奇于荃畚。驅雉囿之凡羽。網驪淵之明珠。亦足以自雄其意氣。何必絕山谷而馳驅。若是者。吾又不願徃也。

大夫曰。人間之盛。單矣。然則子將厭塵壤之溷溷。而志巢神山乎。痛草露之涓涓。而心棲元闕乎。今且俾子以綠脈之目。金骨體名。綴青札。通素書。蘭宮玉女。助丹竈。柏囊仙童。傾珉腴。遺以九節綠玉杖。高策萬里。青蚪駒。紫驥赤豹。雍左右。仙樂前導。笙簧竽。而乃凌雲岨。翔神瀛。涉元圃。攀赤城。九華岑。綺千蕤。峩青瑤。海麟鳳之室。洞天瓊花之庭。惟吾意之所適。駕沖颿而飛行。則有金莖神娥。玉藥仙子。碧落侍郎。青牛道士。擷嘒嘒芝用之香。挈靈渠桃花之醴。剖雪谷之冰黎。陳朱神之標李。鼓瑟山應。投壺天喜。羽爵飛而彤霞流。玲簫和而清歌起。歌曰。攀桂旂兮白雲鄉。酌黃露兮餐天漿。千秋萬歲兮樂未央。歌聲未絕。天葩墮前。縞鶴高唳。元龍下旋。斯時也。感鸚蛄之易化。忻金石之永堅。晝長獻而起舞。振銖補而上餐。此神仙之樂。固熊經鳥伸者之所慕也。然而駐顏有藥。換骨無丹。閨風之居。終不可干。子則仙秉天賦。不必聚三花。脫五濁。已得飛玉宇。而凌高寒。往哉其無所疑矣。

潛虛子曰。神仙之事。惚兮恍兮。段誠有之。則必合神山之儔侶。講妙道之角埧。謁官府于上界。受恣籙于

紫宸。吾亦安能忍而爲此。以期接手乎上真。且吾以天地爲穹廡。以元氣爲僑伍。逍搖乎海山之杳冥。依
何乎雲煙之渙聚。亦何以異御列子之風。而仗衛叔之羽乎。

大夫沈思久之。乃悅然而笑曰。噫。吾知之矣。今者天旣厭亂。人皆思治。行將驅犬羊于宇內。翦鱷于澗
次。萬里合軌。四塞無事。堊絕宵哭之聲。邴尠追呼之吏。乃有碧山之麓。魚梁之西。虛堂背郭。短垣循谿。地
饒桂筍。窗宿鳧鷖。長松十樹。五樹。幽鳥朝嘯暮嘯。階綠落瓣。門捎竹低。水檻則游鯉可釣。葑亭則花景常
棲。買鄰接漁樵之里。通徑隔輪鞅之蹊。爰處其中。樂天自守。良書雍左。素琴臥右。古焦石硯。黃磁花斗。校
易研朱。賦詩推手。言培果林。更釀秫酒。熙颺美旭。招我良友。高情說雲。狂歌擊缶。不知主賓。何論稗叟。下
溪之田。秋風運租。蠶織之資。柔桑百株。孺子能文。嬌女知書。入不聞交謫之語。出不爲章服所拘。非捷徑
之可借。非充隱而邀譽。時或策杖聽水。岸巾看雲。糾園笠以觀稼。騎款段以尋春。娛樂陶陶。吾行吾真。邁
志羲皇之上。長爲太平之民。此固人生之至樂。非紛紛者所得而同云。吾以是招子。子之意信乎。其在是
矣。

潛虛子乃瞿然而起。听然而笑曰。有是哉。是固吾所旦夕思之。而不能得者也。向者吾子所言。金鉉銀青
之貴。重輪擲奩之居。豐容繡節之雜沓。寶衣玉食之華腴。以及逞羽獵于朔野。揖真靈于雲衢。如寢如幻。
縹緲空虛。非吾願之所及。故敬謝而勿趨。至若玄宇丕美。圓首康娛。極真境以自適。無危機之可虞。則又
安得不臨風揚袂。望塵脂車。再拜嘉命。請與子俱。

七歎

敍曰。羊腸世路。跬步欹危。蜃海浮煙。彈指樓閣。感之所觸。莫已于言。拉雜書之。名曰七歎。

歲紀彊梧。青陽始謝。曼子端居不怡。隱几而臥。仰天而歎。客或見而問曰。子類有甚不釋于懷者。胡爲是。悵悵而悒悒。而可得聞乎。曼子曰。然。吾慨夫浮俗之不可與居也。九嶷蒼蒼。陰晴翕忽。人寰嶮巖。萬變何極。吾以聞見之所及。舉其尤者。可歎有七。請爲吾子述之。若乃鳴珂上佐。秉節重臣。作天子之股肱。寄朝廷之心膂。吐氣而風雲。隄合揮手而日月可迴。于是雕龍之客。結駟之英。岌華冠而卑拜。高蟬成羣。瑤玉佩以磬趨。縣魚作隊。進堂階一尺。便是青雲。得相公片言。若獲丹袞。朱門未啓。槐柳之行森然。銀鐙旣張。雁鳧之列未散。一旦怨矢忽集。怒電難迴。雕騫一至。卽爲去國之人。白獸誰開。無復朝天之路。向之承色笑。丐齒牙者。此足疑其有鬼。翻手可以爲雲。出國門而悵望。寥寥祖道之筵。登柴車而載馳。寂寂臨歧之贈。其或田閒再起。皇路重驅。狐偁兩腳。還趨翟尉之門。鐵厚十重。更下楊郎之拜。此古今所同慨。實宦海之常情。其可歎者一也。出羣傑士。抱略英材。十年提塞外之軍。萬里寄刀頭之命。霜天劍折。花凝鐵甲之冰。野宿魂驚。瘳斷銀戈之枕。浙矛作食。則美比珍炊。穿沙得泉。則貴侔甘醴。夜雨寒而金癩裂。鉞聲震而馬汗蒸。李光弼之臨敵。短刀輒納。韓中秦武衛之生平。出血甯惟斗計。始得奏龍躍之績。拜虎節之榮。所謂全一生于萬死之中。獲貂蟬于兜牟之內者也。而科目之士。無寸勤尺勞。策勳于估畢。躡身于雲霄。轉乃恃其儔衆。鄙爲武夫。蹉跌小失。糾彈紛起。屬之一吏之力。卽得持其短長。悲夫。北軍太尉。甯知獄吏之

尊南征將軍終被明珠之謗。劾灌夫于坐上。旤基魏其之田。止李廣于亭中。氣盡灞陵之尉。志士爲之扼
擊。豪傑爲之摧心。此其可歎二也。洛陽右戶。淮右鴻商。積寶璐以爲山。量珠璣以論石。其慳且陋者勿論
矣。乃有傾財結客。列鼎餐賓。江湖奇服之倫。潦倒悲歌之士。莫不待之以上客。館之以華居。齊孟嘗之門
下。履盡銜珠。孔北海之坐中。尊常濺玉。黃金脫手。甯絨寶井之珍。紅粉贈人。詎惜章臺之柳。當斯時也。盟
青山而志恩。矢白水以圖報。感激萬狀。流涕縱橫。及乎金穴潛銷。銅陵漸圯。主人老去。路鬼來窺。秋風客
敝。卽同黃葉之飛。夜雨堂空。誰拜總帷之景。甚者欺其孤露。肆彼陰奸。隨浮鷺而偶集。原同舍北之鷓。化
妖鳥以啄人。舊是堂前之燕。置厚地高天于不問。甘牛襟馬裾而無慙。人情至此。世道何論。此其可歎三
也。中都俊彥。東魯諸生。抱好修之真。探文章之奧。迎羲和之始景。晨銜點朱。送望舒之末輝。夕館披卷。用
能源湖學海。心鏡芬囿。飛藻有麟鳳之采。羅帽皆星斗之芒。章華視草。豈惟作賦之才。柏梁聯吟。何愧簪
豪之選。然乃省門屢踏。席帽雜拋。誦五千卷之祕籍。僅爲章句之師。餐三百饈之黃齋。曾無食肉之相。青
衫風冷。蕉萃可知。白髮霜添。生平已矣。而彼赫翕豪右。齷齪富人。或起家于狎胥。或罔利于黜僧。目不識
一丁之字。窈不到二酉之山。高雍金貨。雄長閭里。童騎如虎。視衣冠若綴旒。意氣如雲。輕單寒儕。士梗至
于歲時之會。盛服高坐。倨態雍腫。狂論偶發。四坐爲之傾聽。卮酒一行。諸父不斂膝席。而局趣寒生。默然
面壁。僵蟬比噤。共笑語者何人。飢鸞不輝。覺揄擲之皆鬼。嗟乎。讀萬卷書。不及屠沽兒。昔人所爲傷也。此
其可歎四也。切玉定分。佩蘭同心。十年則瑩案促襟。一闕則雞鳴蹴舞。應詹厲學。與韋郎爲弟。昆張軌易。

衣視樂安而莫逆。當斯之時。結綬彈冠之願。乘車戴笠之盟。幾欲勒金石以表誠。矢鬼神而證信。無何。春雷破壁。巖穴有起蟄之鱗。神山引風。蓬萊嘯垂翅之鳥。升沈既判。雲泥斯分。溯結契之誠。念相知之雅。故人無恙。重聯風雨之牀。鷗從登堂。無爽生平之約。卽雲龍之合。無日勞燕之飛。各天猶當走一介之使。濟其清寒。寄千里之書。勸之餐斛。脫令死生異路。幽顯殊途。黃壚風景。傲忘竹林之年。西華弟兄。時恤葛巾之困。揆情準理。固其宜也。奈何青雲之身始致。白首之誓頓忘。華門停上客之車。窮巷斷貴人之轍。或素書將意。則置之若罔聞。或芒屨相從。則接之以冷面。笙歌列侍。何思席硯之歡。繡纛被躬。安憶布衣之好。旣謝貢王之徽烈。更蔑管鮑之清塵。甚而嫉其茂學。陰謀設毒螫之機。畏其故知。先計阻飛鴻之路。嗟乎。交期安在。過猶馬耳之風。人心難窺。嶮甚虎鬚之峽。誠無怪乎。王仲回有撻子之戒。劉孝標廣絕交之論也。此其可歎五也。葦繫末親。蘿牽疏戚。瓊瑤互答。筐篚相將。羊酒之奉。覆繡靶以登門。縑帛之遺。薦雕槃而疊几。佳節招邀之局。選錯遴珍。春風嫁娶之天。添珠助玉。莫不競巧麗。尙侈華。本俗習之移人。託殷勤而結好。然而芳楹絡繹。祇屬鼎門。瑤簋紛紜。但陳華屋。至于蕭條古巷。寂寞寒家。雖復里閭宿好。襟袂通親。旣往返之無人。亦饋遺之絕迹。甚至嬋媢譖舊。則絨脣而羞脣。貉緼相遭。則障面而竟避。或有飛書乞米。敬戶呼寒。驚糧滿地。偏慳稊粒之分。龍縞雜投。翻惜絮袍之贈。悲夫。豪家一擲之費。卽寒士終歲之需。于彼則強近而損其高資。于此則割誼而珍其餘瀝。斯簿俗所常見。誠不解其何心。其可歎六也。馬醫賤裔。輶揮白徒。鴻都諾價。乞靈鵝眼之中。羽章飾身。廁名羊胃之列。象乃出入簪林。焜煌梓里。高輿結翠。大

馬如龍。藉鑽刺之專長。開招納之捷徑。則有金牛刺史。餓豺令君。悅其狐媚。接以杯酒之歡。仗其狡謀。通此營財之路。因以爲虐鄉曲。作橫里門。蓄雕臂之少年。結虎冠之桀隸。魚陂豪奪。千頃不以爲多。鱗腩巧侵。百畦猶嫌其少。善類畏若蛇蝎。萌愚尊爲帝天。而一二措紳耆德。閉戶養高。首鼠無主。翻防患乎蚋沙。暗鸞若叱。任肆鳴乎鵬子。象令魍魅。走光天之下。睽暘爭輝。犬羊蒙文虎之皮。跳跟無忌。其可歎七也。是七者。皆在昔所同然。非今時之創局。就所共賭。已足感懷。若欲究塵海之風波。窮人情之雲雨。則誠盡南山之竹。莫罄其書。量恆河之沙。罔知其數者矣。于是客亦不覺愀然以思。慨然而起。相與附膺長歎。不能置云。

僕以下才局迹緹素聞聲輸心比應辟校經居會城之戴氏聽園松格既瞻松情斯暢獲附裙屐之列珠玉可親亂點金銀之車黃墨多暇乃定傾蓋之分高歌寶劍之篇談深燭寒吟涼雨墜當是時也邁孫先生將以先生駢體之文謀付剞劂於是玉牋親寫瑤葩濯鮮墨雨一揮縹雲萬疊吸華吐粕瓌采鑿霞都爲一編排比成卷受而讀之口香三日挹華嶺之玉漿咳唾九天破葩苑之瓊響遂付雕梨之手用作饋貧之糧會以風雪歲闌爰理歸櫂每用翹結蒼江渺然聽園梅開積思成疾旣而稽山日落渭北春深每望王孫其未歸乃結山鬼以爲伍嗚呼庾信有傷心之感內史與陳迹之悲天上樓成山郵謬惡巫咸忽下幽顯永分亦可悲矣夫人生百年流電一瞥凡託命於枯管多絨耀於窮山通眉不凡名葩永播奇胃所發雕章益工然而脫葉亂飛遺藁散佚已感螭蛄之易化安冀天地之長留難餘死後之香實亦意內之事安得有如邁孫先生發襲芸之藏深援琴之泣傷故人之永逝訂敬禮之遺文者乎爰以校字聊綴小文嗟嗟靈鶴無言隻雞未奠芸帙在手零璣僅存心也慕之誠儒林之宏詣作者往矣是芬途之導師仁和張大昌集原文句跋於戴氏聽園

僕以九招局迹卷八藍洲書卷五與陳聞聲卷七報李應辟卷七送余松格卷六復見心瑤情卷三與秦獲附卷二
 社諸子書珠玉卷六序亂點卷五報黃墨卷三與秦乃定卷六蘭裕訓高歌卷七報李談深卷七上吟涼卷六
 訓導陳當是卷三奉社邁孫先生卷七靈芬先生駢體卷七書煙霞謀付卷七桐屋玉牋卷七靈芬瑤
 君誄卷七黃墨雨卷二詩安縹雲卷七書煙霞吸華卷六蘭裕訓瓌采卷七詩序春都爲卷三退宜排比卷三
 葩烈婦誄卷七黃墨雨卷二詩安縹雲卷七書煙霞吸華卷六蘭裕訓瓌采卷七詩序春都爲卷三退宜排比卷三

眉叔笙月詞四卷。琴景詞一卷。同治壬申刻於聽園。亦既有井水處能歌矣。予爲刻縵雅堂駢文。在光緒辛巳秋。書成。眉叔已不及見。嗚呼。負吾友矣。今年秋。覲得未刻詞若干闕。與譚君仲修。一再斟酌。仍付手民。次爲笙月詞第五卷。其亦春蠶未盡之絲也已。眉叔尙有詩集十二卷。感於家。儼爲續刻。以傳於世。吾身健在。請志息壤。己丑十月邁孫記。

